

清吳溶堂氏著

幼科易知錄

上海中醫書局發行

上海图书馆藏书



A541 212 0012 1601B

幼科易知錄陳序

醫學之有幼科。何自昉乎。痘疹全書。嫁名扁鵲。而痘疹實始於漢建武八年。則

所謂越人西入咸陽。卽爲小兒醫者僞也。顧願經託名王母金文。而唐藝文志

以上不見收。則所謂黃帝藏於金匱。師巫得之崆峒者誕也。攷晁氏讀書志有

錢氏小兒方八卷。稱錢乙窮工療嬰孺病。宋史方技傳紀乙嘗召至京師。視長

公主女疾。授翰林醫學。是幼科緣始不可考。而其術自宋人始精。斷斷然已有

宋一代。於醫學最爲慎重。朝廷至設科考試。其太醫局程文。至今猶有存者。呼今

醫生曰郎中曰大夫亦沿宋稱詳見余所著鄉諺證古故當時士大夫亦往往留心方藥。掇拾紀載。藉爲

養身濟世之助。賈生有云。古之至人。不居朝廷。必隱於醫道。宜然也。今士人視

古籍如讎寇。何有於百家技術之書。而所謂醫者。乃使市儈僮夫。假以餬口。天

海
館
藏
書

1616737

時之陰陽。地勢之燥濕。人身之強弱剛柔。物性之異同宜忌。百不一審。偶涉獵方書。略記草木蟲魚金石諸品。孰習而暮售。輕試而雜投。譬之操斧斤。走山谷。貞松古柏。或驟不至。戕賊其本根。而萌孽初生者。無倖免矣。何其忍也。康祺昔官郎署職業。閑暇嘗取唐宋說部及近賢筆記中所載單方。裒錄成帙。成效未覩。不敢遽付削人。先兄通議君則嘗與平湖葉孝廉鏗校刊吳氏保嬰易知錄。寄余京師。精詳平易。綱舉目張。蓋屢試屢効者。先兄敦篤好善。孝廉治經實事求是。爲吾浙耆儒宿學。其醪貲。鉉是書。必無毫髮之不愜於心。可深信者。頃余出宰琴川。公暇延納搢紳。釐整邑中諸善舉。屈君蘭坡方董督育嬰堂。規畫井然。孩裸肥碩。余心重之。顧莞莞孺稚。偶嬰疹厲。患瘍瘡。苦無良醫。或瀕於險。因出篋中易知錄。屬君校讎鐫刻。而捐廉爲之倡。君勇於任事。逾月告成。從此常則有鞠養之方。疾則有療治之術。受其益者。當不止一堂數十嬰矣。惟康祺

承乏半年。舉一廢百。一邑之中。生聚教訓。因革損益。大於是者。何限誠求保赤之道。願諸君子益有以進之。則尤余之厚幸也夫。

光緒五年己卯閏月鄞陳康祺序於虞東官廨讀有用書齋

汪序

吳君溶堂集育嬰之說。與夫治疾之方。分爲二卷。顏曰保嬰易知錄。余觀其博觀約取。簡而明。精而核。若網在綱。有條不紊。作而曰。若溶堂者。庶幾善保赤者乎。前合梓宜麟達生二編。慎之於受氣之先。固無事於醫藥。而不能必其皆然也。有是錄以治之。於既疾之後。則疾無弗瘳。其事實有相須而適相成者。是書又曷可少也。余素未學醫。深愧無濟人之術。爰鳩貲勸付剞劂。更冀樂善君子廣爲刊布。庶使道遠而不及求醫。與茫昧而束手無策者。皆有成法可遵也夫。

嘉慶壬申孟秋之望陽湖汪和鼎味根氏序

潘序

保嬰易知錄二卷。補遺一卷。毘陵吳溶堂先生撰。同邑汪味根先生鳩貲剞劂。余久欲募刊以廣其傳。艱於集腋。道光乙未夏宣城李萼村明府宰密雲。延余課其哲嗣允棻。明府爲政誠求保赤。以廉仁勤敏著。所至民仰之若慈父母。素精軒岐術。尤喜製合經驗方藥濟人。允棻稟承庭訓。亦孜孜爲善。惟恐弗及。余舉此書語之。卽稟命捐貲。郵致吳門開雕。余旣喜夙願之得償。而尤望樂善者之轉相刊印。以大廣其傳也。爰書此誌之簡端。

道光丙申夏四月吳郡潘鍾恕齋氏識

吳序

余續宜麟策成。復採羣書而慎取之。集鞠養之說。一十有五爲上卷。初生之疾。六十有七爲下卷。題曰保嬰易知錄。或曰誠求保赤。不學易能以鞠養之宜。詔之閨闈。是固無難領會也。古稱兒醫曰啞科。最難調理。况乎胎疾。尤貴揣摩。欲使人盡能醫。談何容易。余謂不然。小兒出腹。精之至。和之至。直養何難。揆其致病。或母氣之偏。或姑息之過。非如雜症多歧。四診難決。今爲之著其病因。明其証候。一披條領。可無過差。豈誠求者獨不能消息於其間乎。惟胎疾既驟且危。倘村居僻遠。或城關嚴阻。求醫遲至。至已束手無策。曷若示以可遵之成法。速行投治爲愈耶。然而病至而爲之治。不若致謹於未發者之爲豫也。論列鞠養。雖淺近瑣屑。尤當先致意焉。若能進推宜麟策之旨。求諸朕兆之先。則胎氣清。

純完固。疾何由生。上工治未病。其斯謂至治歟。方蠲大製。藥屏奇珍。或不出乎垣籬之內。指顧可得。卽求諸市購之匪難。亦取其易而已矣。

嘉慶十七年仲春陽湖吳甯瀾溶堂氏述

秦序

嗚呼。醫豈易爲哉。非天資高者不能。天資高而不耐勤研古訓者又不能。蓋不耐勤研。不足積其學。天資不高。不足應其變。而於幼科爲尤要。何以故。疾痛不能自陳。惟賴醫者之心與神會也。今人不知醫之難。率令子弟習之。子弟習之而又多能爲貴。於是婦幼諸科。附於大方。僅襲皮毛。不復深究。安望其能生死人而肉白骨哉。開明錢子季寅。怒焉傷之。嘗謂當今之謀。固宜灌輸醫者以學識。而病家亦亟當有所貢獻。一以治其本。一以救其標也。而貢獻之最切者。莫

如刊書。故得一醫籍。必舉以示余。不善棄之。善則刊之。不遺餘力。若王貺全生。指迷方。王肯堂胎產証治等。不下十數種。不醫而醫。用心之仁。超于時醫。實倍。屣焉。今又以幼科易知錄。囑鑒定。原名保嬰易知錄。凡二卷。先之以鞠養。次之以胎疾。終之以雜症。集諸家之大成。而取其精醇。良可貴也。夫自修園倡嬰兒。無七情六慾。動其心。惟外感停食爲之病。後學者競相傳誦。全書之不講久矣。是書之出。願醫者互相揣摩。更願病家各置一編。以備不測。曷勝厚望云。

乙丑四月上海秦伯未序

幼科易知錄

秦序

幼科易知錄目錄

上卷 鞠養類

拭口法

洗兒法

斷臍法

灸臍法

裹臍法

藏衣法

挑口法

剃頭法

乳兒法

哺兒法

眠兒法

襁褓法

提抱法

雜護法

慎疾法

下卷 胎疾類

初生不啼

初生無皮

不乳

目不開

吐不止

不小便

不大便

大小便不通

肛門內合

噤口

撮口

臍風

臍濕

臍瘡

臍突

臍血

天鈞

內鈞

盤腸氣痛

胎驚搐

胎癩

胎寒

胎熱

胎黃

胎肥

胎怯

赤遊風

夜啼

鸞口

懸癰

重腭

重齦

牙關蟲

吐舌

弄舌

重舌

木舌

膜舌

含腮

疳腮

螳螂子

爛眼

赤眼

血眼

血淚

鼻塞

鼻乾

鼻涕

鼻鼈

膚裂出血

肚皮青黑

遍身腫泡

體如水晶

遍身如鱗

腎縮入腹

陰囊腫墜

大小便出血

手拳不展

腳拳不展

足指向後附

胎毒

胎瘡

胎癬

紅絲瘡

猴疔瘡

胎瘤

背窠

湮尻瘡

大治方附

補編

雜症類

風寒

嗜法
漬法

摩法
解表

熨法
咳喘

暑濕

傷暑

霍亂

發黃

燥火

燥症

火症

痰食

消痰
喫土炭茶米生物疔候

消食
調理

溺白

瘡瘍類

白禿瘡

蟻拱頭

戀眉瘡

翻皮瘡

旋耳瘡

耳疔

鼻蠶瘡

唇腫

口糜

走馬牙疳

齒齲

鑽牙疳

舌瘡

承漿瘡

燕窩瘡

痰核瘡

丹毒瘡

天泡瘡

黃水瘡

浸淫瘡

黃爛瘡

疥瘡

痞癩瘡

葡萄疫

手搔瘡

痱子

暑癩

凍瘡

陰腫

陰瘡

肛門作癢

誤吞諸物附

骨哽咽喉附

諸刺入肉附

湯火傷附

眯目附

跌墜傷附

幼科易知錄卷上

陽湖吳甯瀾溶堂輯

鞠養類

拭口法

慈幼編云。保嬰諸書皆云。嬰兒在胎。口含熱物。蓋胎毒也。生下啼聲未出。急用軟帛。或棉裹指拭盡。貴在神速。遲則咽下。伏之於心。遇天行時氣。久熱不除。乃乘於心。心主血脈。得熱而散。流溢於胃。胃主肌肉。發出於外。成瘡疹之毒。世之小兒。無可免者。不知病源在此。又云分娩之時。口含血塊。啼聲一出。隨即咽下。而毒伏於命門。因致他日。發爲驚風痘疹等証。此二說皆非確論。故張景岳辨之曰。嬰兒通體無非氣血所結。何以毒遽如是。即使咽之。亦必從。

便。而。出。何。以。獨。留。爲。害。無。足。憑。也。斯。言。足。破。千。古。疑。案。惟。是。形。體。初。成。固。當。爲。之。清。楚。於。未。啼。時。用。軟。帛。裹。指。拭。去。口。中。之。血。視。兒。強。弱。用。拭。口。法。滌。除。口。中。毒。穢。以。清。臟。腑。誠。爲。初。誕。之。要。法。也。

王璆選方云。以甘草中指壹節許炙碎。以水貳蜆壳。煎壹蜆壳。以棉染點兒口中。吐出惡汁爲佳。若服壹蜆壳不吐。不須更服。不問嬰兒虛實寒熱。皆須服之。薛氏曰。用甘草法後。次用黃連法。硃蜜法。

集驗方云。初生小兒。惡汁留胸。腑壅塞。易生蘊熱。用黃連數塊槌碎。棉裹如妳頭狀。湯內泡浸成黃汁。點兒口中。惡汁自下。乳食便美。後以硃蜜法間與之。葛氏肘后方云。好硃砂壹大豆許。研細水飛。煉赤蜜和成膏。每用壹豆大。乳汁化下。時時滴口中。三日內止。用三粒。臨時更看形色。若面色多青白。啼聲不響者。卽不須服。

千金方云。牛黃半分。飛硃砂末三分。將濃甘草湯和蜜拌勻。旋抹口中。極能辟痰除熱安神。然必母氣多熱。小兒肥盛者可用。清弱者不宜用也。

寶鑑云。兒紅潤色赤。啼聲響快者。用汞粉叁分。漸漸令兒吮之。良久有臍糞下。便佳。此法惟父母有霉毒遺害者可用。否則非宜。

聖惠方云。用甘草法後。用韭根汁塗兒唇上。乾又塗數次。

張景岳曰。用甘草法後。隨用胡桃肉去皮嚼極爛。以稀絹或薄紗包如小棗。納兒口中。使吮其汁。非獨和中。且能養臟。最佳法也。

又曰。若母氣素寒。小兒清弱者。只以淡薑湯拭口。最能去胃寒。通神明。並可免吐瀉之患。此法最妙。人所未知。拭後用核桃法。

醫宗金鑑云。淡豆豉煎濃汁。與兒三五口。其毒自開。繆仲淳廣筆記云。以甘草叁錢。淡豆豉叁錢。入沸湯壹碗。隔水煮乾。至壹貳小盃。以棉爲乳。蘸藥汁入

兒口吮之。以盡爲度。腹內有聲。去胎糞數次。方飲乳。月內永無驚風諸病。

集效方云。小兒落地時。用橄欖壹箇燒研。硃砂末伍分。和勻。嚼生脂麻壹口。涎唾和勻。絹包如棗核大。安兒口中。嘔之。此藥取下腸胃穢毒。令兒少痰。及出痘稀少。

證治準繩云。本兒落下臍帶。瓦上焙燥爲末。臍帶若有伍分重。入硃砂、黃連、甘草、各貳分伍釐。和勻蜜拌。或用生地、當歸煎濃湯。調如糊。做四五次。塗乳母乳頭上。俟兒吞之。必使一日夜吞盡。次日大便遺下穢汗濁垢之物。皆惡毒也。日後不但痘稀。可免變黑歸腎之患。竟有不出者。亦無額門不合之疾。須候臍帶落下。卽便製服。在六七日間爲妙。其硃砂必須研極細末。以甘草湯飛過。此方眞保生最上一乘良法。一以解毒。一以補腎。蓋臍帶乃有生之河車。係於母之命門。兩腎之所主。以腎補腎故耳。

又云嬰兒初生至滿月內時。取豬乳滴口中。可免驚癇痘疹之患。甚效。豬兒飲母乳。便提後腳離乳。急捋之。卽得。

張景岳曰。古法拭口。多用黃連者。不知黃連大苦大寒。小兒以胃氣爲主。安得初生卽可以苦劣之氣相犯。致損胃氣。則他日變嘔變瀉。由此而起矣。大非所宜。又陳文仲曰。小兒初生。便服硃砂輕粉黃連。本欲下胎毒。不知此皆傷脾之藥。輕粉下痰損心。硃砂下涎損神。兒實者服之軟弱。弱者服之易傷。反致變生諸病。此皆見理之談。不可不知。今臚列古法。俾用者消息兒體之強弱。以選擇可也。

洗兒法

產家要訣曰。三日洗兒。曰洗三。其來舊矣。爲其革污穢也。然以縑裹之兒。又復解開入湯。易致感冒驚風等患。故北方生兒。多不洗浴。但以舊絮拭淨。或大

小便處略以水揩抹之。最爲得法。凡遇天氣嚴寒。而兒體脆弱。不妨遲以十日半月擇吉浴之爲妙。若畢竟要浴。出胎便洗。尙爲穩當。三日不必再洗可矣。

保生要方云。兒初生候。浴水未得。且以舊棉絮裹。置大人懷中煖之。浴後仍當如此。雖暑月薄絮亦當漸去之。兒乍離母腹。最畏涼氣。預煎沸湯。以甌貯之。臨時調和冷熱洗之。不犯生水。則不生瘡疥。

醫宗金鑑云。臨浴時須擇無風密處。湯須不冷不熱。適可而止。不可久在水中。冬月恐其受寒。夏日恐其傷熱。

活幼心法云。凡一週之內。謂之芽兒。切忌頻浴。以致濕熱之氣鬱聚不散。身生赤遊丹毒。如胭脂塗染。腫而壯熱。毒一入腹。則肚脹哽氣。以致殺兒。更有洗後失護。爲風邪所傷。身生白泡。腫而壯熱。憎寒。鼻塞痰嗽。故芽兒切忌多浴。

證治準繩云。浴訖。以粉摩之。或以光粉蚌粉撲身。然後包裹。能辟邪收濕散氣。又云。浴兒不可先斷臍帶。候洗了。方斷。不致水濕傷臍。可免臍風臍瘡等症。尤不可用水打濕臍帶。

大生要旨云。兒初生。兩乳必有餅子。須時常揉撮。捏去乳汁。以散爲度。否則腫硬成毒。如初生洗浴時。卽將兩乳頭各捻數把。卽無此患。

馮氏錦囊云。浴湯。煮以金銀。丹砂。虎頭骨。則除驚癇客忤。煮以麥門冬。荊芥。銅鐵。鉛。錫。則安心神。除惡氣。證治準繩云。以桑。槐。榆。桃。柳。各取嫩枝。叁寸長者。貳叁拾節。煎湯。入豬膽汁。貳叁枚。浴之。或以桃。梅。李。楮。根。葉。煎湯。浴之。均令兒不生瘡疥。簡要濟衆方云。以益母草。半觔。剉細。煎滾。溫溫浴之。能除百病。選擇經云。寅卯酉日吉。壬午丁未癸巳日凶。不能上三日。勿犯下三日。

斷臍法

造道集云初生兒宜洗淨。則燥血不留於摺路之間。可令皮膚光澤。然後剪臍。臍乃初生命蒂也。剪之宜長。用粗線縛緊。剪不長。多生臍風。縛不緊。陰間虛腫。

產家要訣云。兒出胎洗畢。斷臍帶。須捋汁。令盡。否則寒濕入腹。或作臍風。又須於近臍陸柒寸處。以線緊紮。以帛包裹。以口咬斷。蓋紮緊則兒血不貫於胞底。自然痿縮。勿脹而易下。卽或延緩數日。亦無大礙。口咬則斷臍不犯乎刀剪。自無冷氣內侵。可免腹中弔痛之虞。如或天時寒沍。坐草艱難。子母勞傷。元氣者。用火燻臍。法見下卷初生不啼方內千金論云。須令至兒足趺上爲度。造道集云。剪之宜長。尺有二寸。

千金論云。臍帶中多有蟲。急剔撥去。不爾入臍成疾。

寶鑑論云。斷臍若用剪刀。先於懷中令煖。

灸臍法

繆仲淳廣筆記曰。兒初生不可剪臍帶。留胞寸許。剪連臍帶上。如法紮緊。即將軟帛貼臍帶根縛住。待三朝用麵和水成薄餅。置兒腹穿臍帶於麵上。將陳蘄艾火灸臍帶近臍處。或三炷。或五七炷。灸須下帳避風。灸畢仍將臍帶包紮好。聽其自脫。七日方脫者。元氣足也。必效方云。此法試之甚良。可用之無慮。

裹臍法

千金論云。治白練令柔軟。方四寸。新綿厚半寸。與帛等。合之。裹臍。調其緩急。則令兒吐衄。不可輕解。倘兒怒啼不已。或衣中有刺。或臍燥刺腹。更當裹臍。冬時須閉戶下帳。燃火令溫煖。卽夏日亦須無風密室。仍以濕粉敷之。

大生要旨云。裹臍須將臍帶盤作一團。用枯礬末摻於帶上。帶雖長。多摻枯礬。

末暑月亦不爲害。以棉紙封蓋。軟絹裹束。日日須要照看。勿令兒尿浸濕。小兒初生最重裹臍。稍有不慎。爲風寒濕所乘。致成臍風。噤口撮口等惡症。一獵見之。便不可治矣。可忽乎哉。

藏衣法

崔氏曰。兒胞衣。須用清水洗之。弗染諸垢。次以清酒淨之。乃納錢一文於衣內。盛於新瓶內。以陳石灰實之。青帛裹瓶口。密密緊蓋。且置隱處。待三日後。然後依月吉地。向陽高燥處。入地三尺埋之。瓶上土厚。牢築。令兒長壽智慧。若藏衣不謹。爲猪狗所食。令兒顛狂。蟲蟻所食。令兒患惡瘡。大鳥食之。令兒兵死。若近廟社。令兒見鬼。近深水汚池。令兒溺死。近墳竈旁。令兒驚惕。近井旁者。令兒聾盲。棄道路街巷者。令兒絕嗣。當門戶者。令兒聲不出耳。聾著水流下者。令兒青盲。棄於火裏者。令兒爛瘡。著林木頭者。令兒自絞死。如此等忌。

蓋亦銅山西崩。洛鐘東應。一氣感通之理。慎勿視爲迂遠而忽之。
論藏衣方位云。須於天德月空處埋之。天德方。正月丁方。二月坤方。三月壬方。
四月辛方。五月乾方。六月甲方。七月癸方。八月艮方。九月丙方。十月乙方。十
一月巽方。十二月庚方。月空方位。單月在丙壬。雙月在甲庚。再擇時憲書吉
日。與兒本命無冲無尅者。用之可也。

挑口法

嬰兒至要云。小兒出胎。氣血收斂。則口內上腭齒根喉舌皆淨。若氣血不斂。胎
毒上攻。無不先見於口內者。或有泡生於上腭。懸癭之前。初起白色。繼則赤
色。最爲惡候。急以指甲摘去其頭。或以針刺之。潰去惡血。速以帛拭淨。毋令
下嚙。此爲第一要著。次看齒根。上有白泡如半粒米狀。急以銀針挑去。再看
齒根。上有黃筋兩條。以葦刀輕輕割斷。以洩惡血。或舌上白屑堆聚。以手指

纏亂髮拭淨。若舌根有膜裹舌。如蘆籜盛水狀者。以針破之。洩其氣。如舌下有膜如石榴子樣。或如蟲形。急以針刺之。其針向兩旁挑破。不可用正針深刺。傷其本路。以上各症。刮淨刺潰之後。以甘草湯絞淨。再用桑樹皮白汁。或陳京墨。或白殭蠶研末。頻頻塗之。或選用拭口諸解毒法。可保無虞。倘父母姑息。爲兒護疼。不爲刺刮。毒無洩路。速則變成臍風。噤口撮口等惡症。百無一生。遲則致成內釣盤腸。驚搐之險。挽救莫及矣。或謂小兒口病。挑動則有病必挑。非此不可。最爲費事。殊不知挑口一法。能洩胎毒。而無傷元氣。較服峻厲之藥。萬分穩妥。安可輕視。

剃頭法

醫宗金鑑云。兒滿月剃頭。須向密室。溫煖處。剃之。爲其氣血未盈。寒風易入。剃頭後。須用杏仁叁枚。研細。入薄荷叁葉。再同研。將麻油滴叁肆點。合膩粉拌。

勻。擦頭上。能避風邪。免生瘡癩熱毒等症。

乳兒法

盲嬰家秘云。兒初誕。用拭口解毒法。腹響胎糞必下。落地一週時。方可與乳。若產母乳汁未行。必擇乳婦壯年體強。乳汁濃白者。徐徐乳之。產母乳汁既行。必先揉去宿乳。此乳不可乳兒。蓋積滯之氣。恐損兒也。

又云。凡兒吮乳。初則乳汁漸行。其來尚緩而少。久則如泉湧。急而且多。急取出之。恐兒氣弱。吞咽不及。錯喉噴吐。傷胃氣也。按乳湧則以二指捺在乳頭兩邊來自緩矣。

千金論云。凡乳兒不可過飽。飽則溢而成嘔吐。大飽以空乳吮之。即消。若乳來多猛。取出按後。再乳切須乳時。先捏去宿熱乳。然後乳之。如乳母欲臥寐。當以臂枕之。令乳與兒頭平。母欲睡著時。即奪其乳。恐其不知飽足。致成嘔吐。且恐睡熟悶。兒口鼻致死。父母交合之間。兒臥於側。或驚起。不可乳兒。蓋氣

亂未定。必能殺兒也。

巢氏云。小兒啼未定。氣不調。母不可與以乳飲。蓋恐乳不得下。停滯胸膈。則爲嘔吐也。

大生要旨云。月內小兒不可聞啼。卽抱一啼。便乳。須令啼哭。則胎中所受熱毒。從此而散。胎中驚風。從此而解。則期月之間。無重舌木舌口噤胎熱之疾。保生要法云。小兒初生。若多睡。勿強與乳。自然長而少病。

顛顛經云。夜間兒乳。母起身坐抱而餵之。勿側臥乳兒。乳後抱兒。使其身直。恐軟弱傾側。致乳溢出也。不爾皆令兒病。

又云。每清早睡醒。欲飲乳。皆須捏去宿乳。

又云。乳汁弗投地。蟲蟻食之。令乳無汁。可沃東壁上佳。

又云。夏不去熱乳。令兒嘔吐。冬不去寒乳。令兒瀉痢。

聶氏曰夏中熱盛乳母浴後或值兒啼不可與乳使兒成胃毒秋成赤白痢浴後必須定息良久捏去熱乳然後乳之

朱丹溪曰乳子之母尤宜節謹飲食下咽乳汁便通情慾中動乳脉必應病氣到乳汁必凝滯兒得此乳疾病立至不吐則瀉不瘡則熱或爲口糜或爲驚搐或爲夜啼或爲腹痛病之初來其瀦必少便須詢問隨證治母母安亦安可消患於未形也

保嬰家秘云乳兒之母當淡滋味一切酒麵肥甘熱物瓜菓生冷寒物皆當禁之又須慎七情調六氣以養太和蓋母強則子強母病則子病母寒則子寒母熱則子熱故保嬰者必先保身

孫兆曰喜乳令兒上氣顛狂亦令兒生痰喘急或生驚
千金翼云怒乳令兒疝氣扁鵲云女子則腹脹

史記華陀論云。乳氣寒虛冷。故令兒便青而啼。千金翼云。令兒咳嗽。千金翼云。熱乳。令兒面黃不食嘔吐。張氏云。熱乳傷損肺氣。令兒龜背。寶鑑云。氣乳。令兒面黃白。乳哺減少。夜啼。覘乳。

又云。病乳。令兒黃瘦。骨蒸盜汗。噉嗽夜哭。及生諸疾。

靈秘云。壅乳。令兒成痰涎。涎壅生驚。寶鑑云。壅乳成乳癖。又吐逆生痰。寶鑑云。魘乳。令兒臍冷腹急而瀉。胸背皆熱。夜啼肌瘦。一如積塊。

千金翼云。醉乳。令兒熱腹急痛。扁鵲云。醉淫隨亂。兒恍惚多驚。

寶鑑云。乳母淫佚情亂。令兒吐瀉身熱。啼叫如鴉。不治。

倉公曰。當風乳。兒風冷入肺。則令咳嗽。

心鑑云。夜露下飲。兒冷氣入咽不散。多成嘔逆。

真訣云。大勞大飢之後。不俟氣息稍和。卽以傷乳。與兒令兒成疳。

朱丹溪曰。乳母致病。事起於默。人多玩忽。醫所不知。故乳母稟受之厚薄。性情之緩急。骨肉之堅脆。德行之善惡。令兒相肖。大有關係。不可不慎也。

醫藥源流云。調攝小兒之法。病家能知之者。千不得一。蓋小兒純陽之體。最宜清冷。今人非太煖。卽太飽。而其尤害者。則在於有病之後。而數與之乳。乳之爲物。得熱則堅。紉如棉絮。况兒有病。則食乳甚稀。乳久不食。則愈充滿。吮則迅疾湧出。較平日之下咽更多。前乳未清。新乳復充。填積胃口。化爲頑痰。頑痰相結。諸脉皆閉而死矣。譬如常人。平日食飯幾何。當病危之時。其食與平時不減。安有不死者哉。然囑病家云。乳不可食。則羣相詬曰。乳猶水也。食之何害。况兒虛如此。全賴乳養。若復禁乳。則餓死矣。不惟不肯信。反將醫者詬罵。其餘之不當食。而食與當食。而反不與之食。種種失宜。不可枚舉。此小兒之所以難治也。

蘭臺軌範云。兒病卽宜少與乳食。若似驚風卽宜斷乳。如欲食與米飲壹勺。必欲食乳。須先將乳擠空。然後以空乳令吮。否則乳下喉中。卽成頑痰。雖神丹無效。俟少安漸與乳可也。

蘭閨口議云。乳之性見酒則凝。試將牛乳一碗。加陳酒一小盃。攪和蒸一沸。乳凝如腐。物性然也。飲乳之兒。父母愛之。戲以酒滴兒口中。往往漸成乳癖。驚癇疳積等症。可不慎哉。

育嬰家秘曰。養子之道。當擇乳母。必取無病婦人。肌肉豐肥。性情平和者爲之。則其乳汁濃厚甘美。瑩白溫和。於子有益。如病寒者乳寒。病熱者乳熱。病瘡者乳毒。貪口腹者則味不純。喜淫慾者則氣不清。何益於子。故宜遠之。

活幼心法云。小兒三週後。必當斷乳。否則脾多濕滯。納穀不旺。易生痰壅洩瀉等症。致兒柔脆難養。

哺兒法

葛氏肘後方云。小兒三日應開腹。助穀神。壯胃氣。用粟米煮爛。研如乳汁。與大豆許。慎不可與雜藥也。

千金論云。兒哺早。不勝穀氣。令頭面體生瘡。愈而復發。又疳弱難養。三十日後。雖哺不多。若不嗜食。強與之不消。復生病。哺乳不進。腹有疾癖。節哺數日。自愈。

保生碎事云。乳者妳也。哺者食也。乳後不得與食。哺後不得與乳。乳食相併。難以尅化。大則成癖。小則成積。疳氣自此始矣。

慈幼外編云。或曰。小兒無傷乳法。卽乳滿而溢。亦無大害。惟與食併。則乳裹食不化。遂成痰癖。是傷食。非傷乳也。故小兒以乳爲主。三歲後方可食糕粥。五歲後方可食葷腥。則一生永無脾胃之疾矣。

大生要旨云、小兒半歲以前、只與乳喫。六箇月後、方與稀粥。週歲以前、切不可喫葷。併忌生冷之物。待一二歲、腸胃稍厚、略與葷喫。養子真訣云、喫熱莫喫冷。喫軟莫喫硬。喫少莫喫多。自然無恙。故凡粘膩乾硬、酸醎辛辣、一切魚肉水菓、濕麵燒炙、煨炒煎燂、俱是發熱難化之物、皆宜禁絕。小兒無知、見物卽愛。豈能知節節之者、父母也。父母不知禁忌、畏其啼哭、無所不與、積成痼疾。追悔莫及。雖曰愛之、其實害之。語云、惜兒須惜食。又云、若要小兒安、常帶三分飢與寒。皆至言也。

保產輯要云、生兒缺乳、不得不喂以穀食。母細嚼以手喂之、不可以口對口喂之。致生疳疾腹脹。

景岳全書云、小兒飲食、有任意偏愛者、無不致病。所謂爽口味多、終作疾也。極宜慎之。嘗見王隱君曰、子幼時酷嗜甘飴、忽一日見飴中有蚯蚓、伸頭而出。

自此不敢食飴。至長始知長者爲之。此可爲節戒之妙法。

錢乙云。兒多因愛惜太過。三兩歲猶未飲食。致脾胃虛弱。一生多病。半年後煎陳米稀粥。粥面時時與之。十月以後漸與稠粥爛飯。以助中氣。但不與乳併自然無病易養。

馮氏錦囊云。凡兒切忌食肉。否則脾胃乃傷。若再甘甜麵食不禁。則令疳蟲積。若食腰子。心。血。腦髓之類。則令走馬疳候。若食葱韭薤蒜。則令心氣鬱結。水竇不通。三焦虛熱。神情昏昧。若食飛禽五雀。則生瘡疥癩癬。燥渴煩悶。若食螺螄蚌蜆鰻鱉蝦蟹等類。則令腸胃不禁。或泄或痢。至於雞肉過食。則生虻蟲。尤宜切忌。

眠兒法

瑣碎錄云。小兒同母睡時。切忌鼻風。口氣吹兒顙門。恐成風疾。

慈幼編云。凡兒小有停滯。於臥後。用手順摩其腹。自胸至臍下。輕輕摩至百數。能順氣消食。

馮氏錦囊云。眠兒以甘菊花瓣實枕。以其能清頭目也。

活嬰方云。臥兒紉舊布多層。襯兒受尿。輪流洗洒。最妙。有用布袋盛稻柴灰。以收濕者。若甫離竈。突火毒未出。兒中之必生丹毒驚癇等惡症。必須將灰篩淨。預貯數日。然後用之。庶乎無碍。

察微錄云。臥兒冬用木桶。夏用竹筐。必須直身向明而臥。倘背明向暗。則兒眠仰。看亮光。易致目精上竄。臥旁切近之處。不可有悅目引看之物。致兒側視。目精左竄右竄。兒帽前亦不可用五彩之飾。亦恐惹兒仰視也。

襁褓法

千金論云。衣兒用父故衣。女用母故衣。改作用故絮。弗使新棉。切不可過厚。恐

令兒壯熱。生瘡發癩。皆自此始。琢玉篇云。富貴之家。不宜爲兒新製綾羅華麗之服。當知爲兒惜福。

大生要旨云。初生小兒。未剃胎頭。不與戴帽。則自幼至長。難於傷風。永無鼻塞拖涕之疾。

巢氏病源云。小兒始生。肌膚未實。宜單衣。不宜煖衣。煖則筋骨緩弱。易發瘡瘍。宜舊絮。不宜新棉。恐汗出表虛。易受寒邪。宜見地氣。尤宜見風。日不見地氣。風日則肌膚柔軟。易得損傷。嘗見富貴之家。重茵疊被。日在懷抱中。雖數歲亦未能行。而田舍小兒。終日暴露。或饑或寒。絕無他病。譬如草木。生於深山大澤中。容易合抱。至園圃奇材異卉。縱加培植。多有秀而不實者。豈貴賤之理有異哉。

馮氏錦囊云。凡寒則加衣。熱則除棉。過寒則氣滯而血凝。過熱則汗出而腠理

洩。以致風邪易入。疾病乃生。更忌解脫。當風然無風日煖。又當抱出遊戲。又不可置之地面。令着地受寒。蓋五臟俞穴。皆係於背。肺臟尤嬌。風寒一感。毫毛畢直。皮膚閉而爲病。咳嗽喘嘔。壯熱憎寒。故兒最要背煖。脾者脾胃處也。胃爲水穀之海。脾爲健運之司。冷則物不腐化。致多腸鳴腹痛。嘔吐泄瀉。故兒更要肚煖。足係陽明胃脈所絡。故曰寒從下起。故兒更要足煖。頭者六陽所會也。况腦爲髓海。涼則堅凝。熱則流泄。或顛顛腫起。頭縫開解。目疾頭瘡。故頭宜涼。心屬離火。若外有客熱。則內動心火。表裏合熱。輕則口乾舌燥。腮紅面赤。重則啼叫驚掣。多躁渴煩。故心胸宜涼。

小兒精要云。初生小兒。不得用油膩手綳裹。春忌覆頂裹足。夏忌飲冷食冰。冬忌火炙衣被。

證治準繩云。嬰兒又當習薄衣之法。當從秋初習之。不可以春夏率減其衣。則

令兒中風寒。所以從秋初習之者。以漸稍加。如此則必耐寒。冬月但當著夾衣。及衲衣之類。極寒則漸加以舊棉。若乃棉衣既厚。更與火烘。則寒未外侵。而熱先入。裏非徒無益。而反害之。

丹溪曰。小兒過用棉絹溫煖之服。以致陽氣不舒。因多發熱。卽至長年。下體勿令過煖。蓋十六歲以前。氣血方盛。如日方升。惟陰常不足耳。下體主陰。得寒涼。則陰易長。過溫煖。則陰暗消。故曲禮曰。童子不衣裘裳。

錢乙曰。小兒衣裳被衲。日曬日收。不宜在外。過夜。古書云。天上有飛星惡鳥。不可干犯。小兒染著戾氣。生無辜疔。如遇失收。當用醋炭熏過。方可衣之。若誤著兒啼叫不絕。須卽換下所著衣服。亦用醋炭烘之。太陽照之。更妙。

提抱法

大生要旨云。兒初生形骸雖具。筋骨甚柔。氣質未實。猶木之柔條軟梗。可使或

曲或直。或俯或仰也。故百日之內。不可豎抱。豎抱則易於惹驚。且必頭傾項軟。有天柱倒側之虞。半歲前。不可獨坐。則風邪入背。脊坐獨骨受傷。有龜背。偻僂之疾。

張渙曰。兒生六十日後。則瞳子成。而能笑認人。切忌生人懷抱。及見非常。百日則任脈成。自能反覆。一百八十日則尻骨成。母當令兒學坐。二百四十日則掌骨成。母當扶教匍匐。三百日則髓骨成。母當扶教兒立。週歲之後。則膝骨成。母當扶教兒行。皆育兒一定之法。若日捧懷抱。不見風日。不著地氣。以致筋骨緩弱。數歲不行。少一失護。疾病乃生。此皆保育太過之失。

育嬰家秘云。小兒專愛一人懷抱。見他人則避之。此神怯弱也。抱之則喜。放之行坐則哭者。此氣血虛也。

慈幼編云。凡小兒初有知識。不可令小厮婦女領出外頑耍。易致驚嚇。且言語戲笑。便有一種下流習氣。卽蹉跌受驚。亦不使知。誤事不小。切不可離大人左右。至乳母須時加覺察。睡臥早起。皆宜親看。不可託大。每見乳母作弊。外人盡知。主母不覺。兒受冤枉者多矣。

馮氏錦囊云。凡戲謔之物。不令恣樂。刀劍凶具。無使摸捉。莫近猿猴。近則傷意。莫抱鷓鴣。抱恐傷眼。男方學語。勿令揮霍。會坐勿久。令腰似折。行莫令早。筋骨柔弱。雷鳴擊鼓。莫爲掩耳。睡臥須節。須令早起。飲食休過。衣勿重襲。常食蔬羹。休哺美味。甘肥酸冷。薑蒜瓜菓。油膩生茄。切勿過食。夜莫停燈。晝莫說鬼。睡莫當風。坐莫近水。笑極與和。哭極與喜。笑哭之後。莫卽與乳。

大全云。大人與小兒嬉。戲捏其腮頰。則令小兒淌口水。

育嬰家秘云。小兒神氣衰弱。勿見非常之物。或見未識之人。或聞雞鳴犬吠。或

見牛馬禽獸嬉戲驚嚇。或聞人之叫呼。雷霆銃爆之聲。未有不驚動者也。易成客忤驚癇之病。蓋心藏神。驚則傷神。腎藏志。恐則失志。大人皆然。小兒爲甚。凡小兒嬉戲。不可妄指他物。作蟲作蛇。以嚇止之。小兒啼哭。不可令人裝扮欺詐。以止其啼。使神志昏亂。心小膽怯。成客忤也。

又云。小兒玩弄嬉戲。常在目前之物。不可強奪去之。則令生怒。但勿令弄刀劍。啣銅錢。近水火。入廟堂。見鬼神耳。

田氏曰。小兒過煖生熱。熱極生風。提抱生癰。餵飼生癖。最宜慎之。

養子真訣云。乳子須調護。看承莫縱弛。乳多終損胃。食舊卽傷脾。衾厚非爲益。衣單正所宜。無風頻見日。寒暑順天時。

生生編云。小兒不可就瓢及瓶中飲水。否則令兒言語多訥。

馮氏錦囊云。凡母抱兒。切勿哭泣。淚入兒眼。令兒眼枯。

育嬰家秘云。小兒能言。必教之以正言。如鄙俚之言。勿語也。能食。則教之恭敬。如褻慢之習。勿作也。能坐。能行。則扶持之。勿使傾跌也。宗族鄉黨之人。則教以親疎尊卑。長幼之分。勿使諛慢也。言語問答。教以誠實。勿使欺妄也。賓客往來。教以拜揖迎送。勿使退避也。衣服器用。五穀六畜之類。遇物。則教之。使其知之也。或教以數目。或教以方隅。或教以歲月時日之類。如此。則不但無疾。而知識亦早矣。

慎疾法

錢氏曰。小兒氣血未充。而一生盛衰之基。全在幼時培養之得失。故飲食宜調。寒溫宜適。若在期內。斷然生不得病。須知小孩身體微弱。臟腑柔脆。豈堪先以疾害摧其生機。繼以藥困復遭屠毒。精神暗耗。戕賊早歲。能保長生乎。疾呼錄云。小兒無病。切忌服藥。否則遇疾無效。

張景岳曰。小兒偶因寒熱。不調柔弱肌腠。最易感冒發熱。不必用藥。但於熟睡之時。夏以單被。冬以綿被。蒙頭鬆蓋。勿壅其鼻。但以稍煖爲度。使其鼻息出入。皆此煖氣。少頃則微汗津津。務令上下稍透。則表裏通達。而熱自退矣。若寒天衣被冷冽。汗不易得。則輕摻著身。赤體相貼。而上覆其面。則無有不汗出者。此至妙之法。百發百中者也。若寒邪甚者。兩三微汗之。無有不愈。此法行於寅卯之時。則汗易出而效尤速。

張渙曰。乳母須每日三時。摸兒頂後風池。若壯熱者。卽須熨之。使微汗而愈。諺云。戒養小兒。謹護風池。風池在頸項筋兩轅之邊。

保嬰撮要云。幼科有拏掐法。乃按摩之變也。小兒未週歲。難以藥餌。治誠宜之。然可以治外邪。而不能治內病也。可以治小病及氣實者。如大病氣虛者。用之無益也。爲父母者宜知之。

指南云。小兒諸病。如發熱無汗。煩躁神昏。譫語之頃。或戰汗。大汗將止之時。或嘔吐泄瀉之後。或痙厥漸甦。或便久閉而適然大便。或灌藥之後。斯時正元氣與病邪交戰之際。若能養得元氣一分。卽退一分病邪。此際小兒必有昏昏欲睡。懶於言語。氣怯神弱。身不轉動之狀。此正當養其元神。冀其邪退。正復。乃病家父母。偏於此際。張惶驚恐。因其不語而呼之喚之。因其鼾睡而頻叫醒之。因其不動而搖之拍之。或因微有昏譫。而必詳詰之。或急欲以湯飲進之。或屢問其痛癢之處。曉曉不已。使其無片刻安甯。如此必變輕爲重。變重爲死矣。更有豪富之家。延醫多人。問候者多人。房中聚集者多人。或互談病情病狀。夜則多燃燈燭以照之。或對之哭泣不已。或信巫不信醫。祈禱疊興。舉家紛擾。此非愛之實以殺之也。

活幼芻言云。小兒有疾。口不能言。脈無可診。名曰啞科。醫者不可不究其病源。

而。主。家。亦。須。詳。審。而。明。言。之。愚。者。拱。默。而。令。醫。師。切。脈。以。試。其。知。病。否。是。以。兒。命。爲。鵠。也。孫。眞。人。云。未。診。先。問。最。爲。有。準。蘇。東。坡。云。只。圖。愈。疾。不。欲。困。醫。徐。氏。曰。小。兒。致。病。之。由。有。婢。媪。明。知。而。不。敢。言。者。當。委。曲。善。詢。之。若。加。以。聲。色。是。緘。其。口。也。旨。哉。斯。言。

醫。學。源。流。論。種。痘。云。種。痘。之。法。此。仙。傳。也。有。九。善。焉。凡。物。欲。其。聚。惟。痘。不。欲。其。聚。痘。未。出。而。強。之。出。則。毒。不。聚。一。也。凡。物。欲。其。多。痘。欲。其。少。強。之。出。必。少。二。也。凡。物。欲。其。大。痘。欲。其。小。強。之。出。必。小。三。也。不。感。時。痘。之。戾。氣。四。也。擇。天。地。溫。和。之。日。五。也。擇。小。兒。無。他。病。之。時。六。也。其。痘。苗。皆。取。種。出。無。毒。之。善。種。七。也。凡。痘。必。漿。成。十。分。而。後。毒。不。陷。種。痘。之。漿。五。分。以。上。卽。無。害。八。也。凡。痘。必。十。二。朝。成。靨。并。有。延。至。一。月。者。種。痘。則。九。朝。已。回。九。也。其。有。種。而。死。者。深。用。悔。恨。不。知。種。而。死。者。則。自。出。斷。無。不。死。之。理。不。必。悔。也。至。於。種。出。危。險。之。痘。

或生痘毒。此則醫家不能用藥之故。種痘之人。更能略知治痘之法。則尤爲十全矣。

種痘訣云。夫痘者胎毒也。根於先天。發於時氣。內外合邪。兩難分解。吉少凶多。天生天殺。無可如何。自有種痘之法。去險履平。避危就安。有參贊化育之功焉。以苗引毒。同氣氤氳。蓋發於小兒安甯無病之時。外無客邪鼓動血氣。內無積滯壅閉經絡。可免癢塌悶亂之虞。且正氣內守。稍干禁忌。尙無妨礙。脫痂絕無癍痕。口鼻亦無殘廢。誠神功也。亦仁術也。其法有水種旱種衣種漿種之異。惟水種最屬平穩。其法擇上等痘痂和水研細。新綿濕裏。分男左女右。納兒鼻孔。時時看守。倘小兒用手拈出。或被嚏出。急將苗塞鼻內。不可稍緩。恐洩苗氣。下苗後以六個時辰爲度。然後取出。如天氣尙寒。多留數刻。若時令已煖。少留數刻。要在臨時斟酌。苗順亦順。醫者之選苗最爲第一要著。

而尤貴得時。則種春季爲上。秋冬雨季次之。夏季斷不可種。即可種之時。亦不可種。皆如春應溫而反寒。夏應熱而反涼。秋應涼而反熱。冬應寒而反溫。是皆天時不正之厲氣。小兒調理未遑。敢言種痘乎。又值正痘初行。疫邪方熾之時。尤當避其銳氣。必當俟大勢稍平。時氣就和。再爲議種。方保萬全。若既種之後。忽爾寒暄。此則所遇不齊。偶爾變氣。出於意外。是在保護者之謹之又謹。以保無虞。種痘之期。上苗後大約七日始發熱。發熱三日而見點。見點三日而出齊。出齊三日而灌漿。漿足三日而回水結痂。而大功成矣。或因苗氣透洩。或因兒體壯實。艱於傳進。胎毒深邃。不能引出。竟不發者。有之。當逾十一日爲度。然後細察天時之順。兒體之實。再爲補種。亦可。然補種究非全策。不可孟浪也。卽初次下苗。亦當細審。凡小兒氣血沖和。臟腑均平。內無痰熱食積所傷。外無六淫之氣相侵者。方可如法種之。若病後之兒。及顛

色太嬌。骨幹太弱。飢理太疎者。皆未可輕試。種痘以七日爲期。五臟傳遍。始發熱者。常也。卽遲至九日十一日而發者。亦無足怪。若發熱於五日以前。此時苗氣尙未傳到。毒何由而發耶。必因種後適逢天行時氣。小兒感染而成。乃自出之正痘。非苗氣引出之種痘。是又不可不知。或順或逆。豈可過責醫家乎。至於保護之法。不可因種痘而忽之。偷兒之父母。行事疎忽。不知調攝。不守禁忌。不信醫藥。過於溺愛。驕縱者。能無意外之變歟。

調攝法云。出痘以調攝爲第一義。自始至終。不可稍忽。要不過避風寒。慎飲食而已。天氣嚴寒。覆蓋宜溫煖。勿使受寒。恐被寒氣所觸。則痘不得出。亦不可重茵疊被。使熱氣壅滯。致痘不宣發。天氣溫煖。覆蓋宜適中。恐客熱與毒相併。致增煩熱。亦不可輕易著單露體。使寒氣外侵。阻遏生發之氣。此寒熱所以貴得其平也。人之氣血。必藉飲食生化。痘之始終。全賴乎此。若飲食虧少。

氣血何所資助乎。但不可過甚。若過飲。則飲停不化津液。若過食。則食滯必生痰熱。所以吮乳之兒。不多乳。不缺乳。能食之兒。勿餐辛熱炙燻。勿啖黏硬生冷。勿恣意茶湯。勿使飲涼漿食。不過飽。亦不過飢。此飲食所以貴得其平也。至於寒熱飲食之外。凡舉止動作。既不可任意驕縱。亦不可過於拂逆。惟在調攝之人。耐其性情。自見苗以至落痂之後。兢兢業業。善爲保護。始保萬全。

禁忌訣云。出痘之家。房中最宜潔淨。切忌沖犯。最喜明亮。不可幽暗。擇老成耐事之人。屢經過小兒出痘者。令其調護不離左右。一切禁忌。俱當遵守。勿詈罵怒呼。勿言語驚慌。勿對梳頭。勿對搔癢。勿對飲食。勿對嗜酒。勿對歌樂。凡房內淫液氣。婦人經候氣。腋下狐臭氣。行遠勞汗氣。溝渠糞穢氣。諸瘡腥臭氣。砒硫蚊烟氣。誤燒頭髮氣。吹滅燈燭氣。誤燒魚骨氣。葱蒜韭薤氣。煎炒油

烟氣。醉酒。葷腥氣。冰麝。竄烈氣。均須避之。或燒辟邪丹。或乾紅棗黃熟香以解之。若蒼朮之氣。則太峻也。其無可解者。父母忌房室。犯之。兒痘必變。輕爲重。更當囑左右之人。倘值迅雷烈風暴雨之變。及鑼鉞金器之聲。大宜安定。不使兒驚。其幃帳宜謹。蓋覆宜密。切勿暴動生風。再令人謹守其門。不許生人往來。不許僧道師巫孝服之人入室。至於痘兒。勿令洗面。恐水損眼。眼鼻勿動其痂。則無眼弔鼻齷之患。行坐勿令太早。免致腰酸腳痛之虞。能食者與鯽魚白鯨之屬。切不可與生冷瓜柿梨橘韭蒜醋醬糝粽雞鵝椒薑辛辣等物。雞子害目不可食。百日之內。若飲酒食糟。雖少必成赤鼻。以上禁忌。一切謹守則吉。稍有疎忽。每至敗事。

可種訣云。小兒面部紅潤。精彩明亮。透達印堂山根年壽。眼下口角。無青暗之色。○兩眼黑白分明。瞻視平正。愈看愈有神氣精光。○顙不陷不填。○頭不

解顛。○鼻孔不小。○氣清不濁。○聲音清亮。○天柱骨正。○頸不歪斜。○骨肉相稱。○又宜緊束。○肥不見肉。○瘦不露骨。○小便遠而長。○腎囊小。○微帶紫黑色。○如荔枝壳。○身無癩癬瘡疥。○項無結核。○腹無積聚。○形氣充實。○精神強健。○臟腑調順。○呼吸和平。○以上皆可種。

不可種訣云、小兒面色青白。或鰲黑痿黃。無喜色。無精彩。○兩目黑多白少。白暗帶青色。視瞻歪斜。暗昧無神。○顛陷顛填。○解顛。○顛不合。○五軟。○五鞭。○龜胸。○龜背。○鶴膝。○鼻孔小。○氣濁。○聲音不亮不長。肉不束骨。鬆如發麵樣。○身體瘦無膈肉。○身有癩癬瘡疥。○腹有疝積。○項有結核。○病後元氣未復。○素有驚癇之症。○失乳之後。○氣血不足。○脾胃虛弱。○精神倦怠。○脈不和平。○以上皆不可種。

疹家精義云、疹之與痘原非一種。雖痘之變態多端。而疹之收斂稍易。然疹之

甚者其勢凶危亦不減於痘。最爲可畏蓋疹亦胎毒蘊於脾肺故發於皮毛肌肉之間。一時傳染大小相似則未有不由於天行癘氣而發者。此其源雖雖內發而證多屬表。總由君相二火燔灼太陰而脾肺受之。故其爲證初熱一日。至次日雞鳴時其熱卽止。止存五心微熱。漸見咳嗽鼻流清涕。或腹中作痛。飲食漸減。到申酉之間其熱復來。如此者四日。用手滿按髮隙處甚熱。其面上熱稍減二三。分咳嗽連聲。面燥腮赤。眼中多淚。噴嚏頻發。或忽然鼻中出血。至五日其熱不分晝夜。六日早時其疹出在兩頰下細細紅點。至午時。兩手背並腰下及渾身。密密俱有紅點。輕者三日。重者或五日。或七日。普遍焮發。其鼻中清涕不流。噴嚏亦不行。兩頰顏色漸淡。此出疹之期也。凡疹初熱疑似之間。切不可輕易用藥。總有他證。必待五日。腮下見疹。方可藥之。其調攝之法。亦與痘等。切勿忽視。雖云疹喜清涼而惡濕。痘喜溫煖而惡涼。

然疹子初出之時亦須和煖則易透發蓋疹子只怕不能得出若出盡則毒便解故發疹紅影出於肌膚切戒風寒生冷如一犯之則皮膚閉密毒氣壅滯遂變渾身青紫而毒反內攻煩躁腹痛氣喘悶亂諸證欲出不出危亡立至較痘尤凶尤速也出疹有五六日不飲食此胃爲邪氣所侵亦爲邪氣所養故不食亦不妨疹已出盡卽思飲食不可與麵食雖粥飲亦須自少漸加總宜食淡不可縱口凡辛辣厚味助火酸收之物咸須禁食如酸醋胡椒猪肉核桃梅杏櫻桃梨柿荸薺之類若誤犯之則伏匿焦紫喘脹聲瘖而難救矣卽疹出盡後兩月之內若誤食雞魚則終身皮膚粟起如雞皮之狀或遇天行出疹之時又令重出誤食猪肉則每歲凡遇出疹之月多有下痢誤食鹽酸致令咳嗽則每歲出疹之月必多咳嗽誤食五辛之屬則不時多生驚熱誤食沙糖多發疳蝕誤食酒糟必成赤鼻必須一一謹守庶無終身之患

疹之名目不一。在江蘇曰沙子。在浙江曰醋子。在江西湖廣曰麻。在山陝曰膚瘡。曰糖瘡。曰赤瘡。在直隸曰疹子。名雖不同。其證則一。但疹在痘前者。痘後必復出。惟痘後出者。方爲結局耳。凡疹後餘火刑肺。微微咳嗽。必須醫疹。延之變症堪虞。

吳氏曰。急驚之症。搐搦反張。頭搖目竄。唇動牙咬。壯熱痰潮。神昏便秘。是也。當其搐搦反張之時。切忌把其手足。扳其身軀。若強力持之。致風氣流入筋絡。以致俯仰拘牽。雖生已成殘廢。當其動作之際。置一竹篋。鋪之平地。使兒臥其上。任其搐搦。風力行遍經絡。勢極自止也。醒後易於頻發。宜慎防之。

景岳全書云。初生小兒。以手捻其頭。摸其頤頷。不作聲者爲無病。縱有病。以手指探其口。雖發聲。而從容咂指者。其病輕。若卽發聲。不咂指者。面色或青紅兼紫者。此落地受寒甚也。其病重。若牙關緊閉。不納乳。或硬而不軟。其病極。

重也。

巢氏云。小兒在母腹中。乃生骨氣。五臟六腑。成而未全。自生之後。卽長骨脈。五臟六腑之神智也。變者易也。自己生三日後。三十二日。一變。亦曰一蒸。卽覺情性有異於前者。何也。長生臟腑智意故也。先儒又謂小兒純陽。三十二日一變。六十四日一蒸。每逢變蒸。則心熱意懶。偶觸風寒。則發熱等症作矣。甚則驚風立至。蓋此時尤宜謹慎。感冒變蒸。每挾外邪而易起。外邪或因變蒸而易乘。薛立齋曰。變者上氣蒸者發熱也。輕則體熱虛驚耳冷微汗唇生白泡。三日可愈。重則寒熱脈亂腹痛啼叫不能乳。令食卽吐。喁五日可愈。此證小兒所不免者。雖勿藥可也。若不熱不驚。略無證候而暗變者。蓋受胎氣壯實故也。張景岳曰。蒸變古無其說。創於西晉王叔和。繼於隋唐。繁於今日。但余嘗見兒有保護得宜。至長無病。豈此子獨不蒸變乎。又何以前月病爲蒸。

變。而此月不病。何一孩而先後不同乎。又有暗變之說。更渺茫不足信。總之小兒或發熱。或吐泄。凡屬違和。不由外感。必因內傷。不過將息失宜之故。俱宜謹於平時。不可惑於蒸變之說。而忘致病之由也。

金鑑云。小兒足脛冷。腹虛脹。糞色青。吐乳食。眼珠青。面青白。少神。聲音弱。脈沉微者。內已虛寒。忌投涼藥。若足脛熱。兩腮紅。大便閉。小便黃赤。口渴痰稠。氣粗聲壯。脈緊數者。乃爲熱症。忌投溫熱藥。

任其自落可保
至長不生瘡癩

按小兒門乳前用螺螄柒個雄黃少許搗極爛塗額門穴以紙封蓋

清代名醫醫案菁華

十大特色

一 二 三 四 五 六 七 八 九

一 搜集之富可謂醫案中未有之巨大著作
 二 撰輯精嚴理論與實驗並重與薰蕕不別者不可同日而語
 三 所采醫案大半坊間未見謂為秘錄亦無不可
 四 以人為綱以證為目極便檢查不同凌亂無章者
 五 醫案觀其換方變化處最耐尋味而增巧思故本書于覆診方案
 六 足供研究者悉數采
 七 精華以聚學者得此可免抉之勞亦無盲從之弊
 八 各家卷首附刊小傳俾知其師承及經歷
 九 有諸大名名家題序價值概可想見
 十 印刷精美觀擲帶尤便

本書為上海秦伯未氏所編纂清代二十餘名家之精華如葉天士薛生白吳鞠通尤在涇王旭高張仲華何書田趙海仙馬培之王九峯巢崇山張千里張聿青陳蓮舫秦笛橋凌曉五陳良夫金子久丁甘仁等全書一千餘面四十餘萬言洵未有之巨著洋乎大觀也由楊了公黃任之題簽陳蝶仙錢龍草錢季寅陳无咎王一仁楊宗凱許半龍等詞序跋尤覺價值可貴夫醫案之作玲瓏活潑最足增人慧思而切實說理對證用藥尤屬不同空泛實為醫者不可不人手一編以備不時參攷茲再將本書十大特色披露於后

全書裝訂分平裝洋裝兩種平裝四冊附贈錦盒定價大洋三元七折實售二元一角洋裝一冊布面金字加實洋四角外埠郵費每部兩角又按本書自發售預約後遠至安南台灣東三省等處均紛紛前來訂購一月內銷數達三千以上為中醫界書業界所傳聞茲存書無多購者尚希從速
 中醫書局敬啟

幼科易知錄卷下

胎疾類

初生不啼

或氣閉不通。或難產勞傷胎氣。或天時寒冷所致。謂之夢生。

心鑑云。切不可斷臍。以棉衣包兒。離胞寸許。用苧麻紮緊臍帶。將紙條蘸麻油。點火於臍帶上。緩緩薰燒。俟煖氣入臍。氣回能啼。方可斷也。

又云。將陳蘄艾。炙臍帶上。煖氣透腹。卽生。

尊生書云。用煖臍法。氣已入腹。取壹猫。用青布裏頭目。令一伶俐婦人。拿住猫頭。向兒耳邊。以口咬破猫耳。猫大叫一聲。兒卽醒矣。

外臺秘要云。由於難產少氣也。取臍帶向身。卻捋之。令氣入腹。仍以本生父

母真氣度之

事急方有因口噤不能出聲者，急看兒口內上腭齒齦舌上下，如法刺之刮

之令淨

其詳見上卷挑口法

三因方云，以葱白細鞭背上卽啼，此法似不如葱湯洗其腹，就以熟葱熨其背也。

大生要旨云，有因肛門爲脂膜所基，閉住兒氣，故不能出聲者，以金銀玉簪腳輕輕透破脂膜，卽能出聲，以油紙撚套住，免其再合，參看肛門內合條，初生無皮。

胎中熱毒也。其症有三，審因而治之。

清涼膏治父母霉毒遺害兒上半身，或下半身赤爛，甚至紫黑者，或非因霉毒，由胎中蘊熱所致者，敷之皆效。石灰肆兩，未經水濕成塊者，用水泡之。

沒指半許，露一宿，面有浮起如雲片者，輕輕取之，微帶清水，視其多寡，對小磨香油亦如之，順攪成膏爲度，用鵝翎搽之。

鵝黃散，生黃柏、熟石膏各等分，研細末，加珍珠粉尤效。濕則乾搽，乾則用豬膽汁調敷。

米粉撲法，治月分不足，遍身浸漬紅嫩而光，亦有面白肢冷，不焮赤者。早稻白米研細粉，時時撲之。

生肌散，人參、黃芪、珍珠粉各等分，時時撲之。伏龍肝散，以伏龍肝研細末，雞子白調搽之。

本草方治母處高樓，不沾地氣所致者，車輾上土，研細撲之，或用淨黃土和黃柏敷之，或掘土坑臥宿，卽生皮。

醫通方，夏月臥兒水芭蕉葉上。

不乳

兒初生卽不吮乳。細看兒口中。照挑口法治之。再議與藥。

慎齋方。治牙關不開不吮乳者。其噤在齒根也。南星炙研片。腦少許。二味和勻。指染薑汁。柏葉汁。和藥擦牙根。卽開。如不效。用秘方吹鼻法。

聖惠方。治能吮乳而不能咽者。其噤在咽中也。水銀米粒大。與之。咽下卽愈。

按此方不可輕用

又方。葛蔓燒灰壹字。和乳點之。卽瘥。

卽得方。治兒腹中胎糞未下。腹滿氣促。嘔吐不乳。汞粉伍分。研細。蜜少許。温

水調化。徐徐與之。按此方不可輕用

青蒿丸。見大治方內

良方。小兒熱毒內閉。數日不乳。用活蚌剖開取水。叁肆茶匙服之。取重蚌水法見重膠

陳文仲方，治兒母過食寒涼，胎受其氣，令兒腹痛多啼，面色青白，丁香拾枚，陳皮去白壹錢，乳汁壹盞，石器煎一二十沸，細細與服。

目不開

胎中熱毒，蘊於兒脾，眼胞屬脾，其脈絡緊束，故不能開也。

心鑑方，熊膽、黃連各少許，滾湯淬洗，一日七八次。如無熊膽，將黑羊膽、青魚膽代。

又方，川芎、薄荷、樸硝各壹錢，爲細末，以少許吹鼻中。

活幼新書，甘草壹錢，以猪胆汁炙透，研爲末，每用米泔水調少許灌之。

生地黃湯，乾地黃、赤芍、當歸、瓜蒌根各壹錢，川芎、甘草各伍分，燈心三拾寸。

煎湯與小兒服之

又方，治目不開，或出血，蒼朮貳錢，入猪膽汁中，紫煑，將藥氣熏眼，後更嚼汁

與服

丹溪方以燈心、黃連、秦皮、木賊、紅棗各伍錢，水壹盞，煎澄清，頻洗而開。

吐不止

初生吐不止。古法皆謂穢惡下咽，用鎮墜之品，恐非臟腑柔嫩者所宜。受病之源不一，當審其因以治之。

大千方治咽穢腹滿而痛者。莪朮少許，鹽壹綠豆大，以人乳壹合煎三五沸去滓，入牛黃兩粟大服之甚效。

醫藥八門黃連、枳殼、赤茯苓等分爲末，乳汁調灌之。又方木瓜、生薑煎湯灌之。

湯氏方治觸冒風邪，鼻塞多啼者。全葱白叁枚，紫蘇莖壹錢，生薑壹大片，人乳兩合，煎沸去滓飲之。

黃連二陳湯治胎前受熱，面黃赤，手足溫，口吐黃涎酸粘者，製半夏、陳皮、茯苓。

各等分，甘草、黃連各叁分，加生薑、水煎服。

聖惠方：田中地龍糞壹兩，研末，空心以米湯下之，三服效。加木香叁錢，大黃

伍錢，尤驗。按木香酌減，大黃尤宜慎。

陳文仲方：治胎前受寒，面青白，四肢冷，口吐清稀白沫者。方見不乳。

得效方：治乳積吐。用大麥芽伍錢，生薑壹片，人乳煎沸飲之。

燒針丸：治吐乳痰壅者。用黃丹研末，小棗和丸，如芡實大，針簽於燈上燒過。

研細末，乳汁調服，一方加硃砂、枯礬等分。

不小便

胎受熱毒之氣，流於下也。內服外敷，小便自通。若生而臍腹重脹，臍四旁有青黑色，及撮口者，不治。

豆豉膏、豆豉壹勺，田螺拾玖箇，葱壹大束，同搗爛，用水芭蕉汁調敷臍上，或

將陳大麥芒壹掬煎湯飲

按麥芒須濾淨

蒜螺敷法兼治水腫臃脹大田螺肆箇大蒜伍箇車前子貳叁錢麝香少許前三味同研後入麝香再研爲餅每用壹箇貼臍中將膏藥護之半日許服白馬通壹大盃立通

又方白鳳仙連根帶葉熬水乘熱浸洗外腎兩胯立通單方葱連鬚壹大束搗爛加麝香少許分作貳包更換熨臍下

加導赤散細生地黃叁錢細木通壹錢生甘草叁分黃連叁分飛滑石貳錢赤茯苓貳錢淡竹葉壹張燈心伍拾寸水煎服之

按分兩宜酌減

慎齋全書兼治不乳葱白切肆片乳汁半盃瓦器內同煎沸分肆服飲之又方地龍數條去泥和蜜研敷陰莖上內用蠶退紙燒灰入硃砂龍腦麝香

各壹分共研細末用麥冬燈心湯食前調服

按分兩宜酌減

全幼心鑑、車前子搗汁入蜜少許灌之、屏水車缺內鮮車前子尤效

又方、雄黃牛尿滴毛數拾根、煎湯壹盃飲之、

藥性論、安鹽少許於臍中、以艾灸之、

雷公方、見臍突

不大便

兒生三四日不大便者、名曰鎖肚、乃胎中受辛熱之毒、氣滯不通也、其兒必面赤腹脹、不乳多啼、急用口哂法、再議與藥、

口哂法、令婦人以溫水漱口、哂兒前後心、手足心、並臍、共七處、每處哂三次、以得見紅色爲度、

熨臍法、用連根葱壹莖、生薑壹塊、淡豆豉貳拾粒、鹽壹小匙、同研爛捏作餅、子貼臍中、烘熱熨之、用絹紮定、良久氣透自通、

田氏方先以硬葱，絛入肛門內，如不下，用硃砂水飛，南星炮，巴豆霜，各等分，共爲糊丸，黍米大，薄荷煎湯，灌下，叁丸。

心鑑方，枳殼煨去穰，叁錢，甘草梢壹錢，以水煎服。

必效方，治大小便不通，腹脹欲死，急用白頸蚯蚓搗爛，敷腹上，空臍孔不敷，半時許，取白馬屎，和水絞取汁，灌之，立通。

青蒿丸，見大治方內

備驗方，見臍風

大小便不通

胎中熱毒之甚也，急用前口晒五心臍下法，若延至七日不治。

外臺秘要，猪苓壹兩，以水少許，煮雞屎白壹錢，調服，亦治小便不通

經驗方，真麻油壹兩，皮硝少許，同煎滾冷定，徐徐灌之，又方，輕粉叁分，蜜少。

許溫水化開時與少許亦治大便不通

立效方。大黃酒浸。郁李仁去皮研。各壹錢。滑石末壹兩。搗和丸黍米大。日服

伍丸。開水下。亦治大便不通

青蒿丸

紫霜丸俱見大治方內

以上三症諸方參看擇用

肛門內合

其症有二。或因熱毒太盛。壅結肛門。穀道有孔者。急服黑白散。外以手輕輕拍之。或爲脂膜遮瞞。無隙可通者。先以鉛刀。或金玉簪刺破脂膜。急以油紙撚插入隔之。不令再合。或納蘇合丸導之。

黑白散

蘇合丸俱見大治方內

預防口噤撮口臍風三症及治之宜急論

小兒初生三急症曰口噤。曰撮口。曰臍風。皆惡候也。症雖有三。病源則一。此症發於一臘之內者。方書雖有治療之法。究竟百無一生。其致病之由。總在於臍。臍者在兩腎之間。與命門相通。乃人之根蒂也。衝任胃脈皆起於臍下。任脈自中而上。至於人中。與腎脈合衝脈二道。夾任脈而上。散於舌下。與脾脈合胃脈二道。又夾任脈而上。入於齦中。上下往來。如環無端。小兒初生。三脈方具。而臍爲三脈之門戶。干係尤重。所以斷臍之時。不可不慎。或剪臍帶太短。或結縛不固。致外風侵於臍中。或用鐵器斷臍。爲冷氣所侵。或浴時牽動。水濕灌入。生瘡。客氣乘虛而入。內傷於腎。腎傳肝。肝傳心。心傳脾。脾傳肺。肺蘊蓄其毒。發爲臍風等症。面赤啼哭者。心病也。手起微搐者。肝病也。唇青口撮。痰涎壅塞者。脾病。

也。牙關緊閉者。腎病也。啼聲不出者。肺病也。五症之中。略見一二症者。病猶可治。悉見萬無活理。若能預防於未發之時。急治於將發之際。尙可挽回萬一。凡小兒墮地。視其臍帶軟者無病。如臍帶硬直者。卽有臍風也。或浴後縳裹停當。卽噴嚏連連者。或臍下發出青筋。或赤筋一道上行者。或大便熱者。一有見端。卽爲將發之候。急抱兒向明處。視其口中。或上腭有泡。或齒根有白點。或有黃筋。或舌上白屑推聚。或舌下膜如榴子。急遵挑口法。詳見上卷刺之。刮之。塗之。再視兒臍下逆上之筋。必生兩岔。於岔行盡頭處。安艾灸叁壯。以截上攻之路。更灸中腕叁壯。中腕穴在臍上五寸寸以兒左手中脂屈曲節盡處爲度再灸然谷穴叁壯。穴在內踝前起鍼入叁分。不宜見血。或再於承漿穴。在下頰棧頰車穴。在耳下頰骨端各灸叁壯。以洩其毒發之標。此皆古人預防急治之良法也。若不知早爲之計。病變已重而藥之。鮮克有濟矣。爲兒父母者。可不慎之於始哉。

噤口

其候舌上生瘡如黍米狀。啼聲漸小。口吐白沫。牙關緊急。吮乳不得。由胎熱內蘊。風寒外襲。故也。見於七日及一月之內曰噤口。見於百晬之內。百二十日之後者曰噤風。風噤其實一也。

秘方擦牙散。生南星貳錢。去皮臍。龍腦少許。研爲極細末。用指蘸合生薑汁。放於牙根上擦之。如不開者。將藥調如稀糊。含在不病人口中。用通心筆管。插入小兒鼻孔。用氣將藥極力吹入。其關立時卽開。此法有通仙之妙。不可不知。

本草綱目方。天南星壹枚。煨熟。紙裹斜包。翦一孔透氣於口中。牙關自開。搯鼻法。鬱金。藜蘆。瓜蒂。各等分爲末。搯鼻中。

聖惠方。直僵蠶貳條。去絲嘴。略炒爲末。蜜調敷唇中。

辰砂全蠍散，辰砂伍分飛，全蠍貳枚去毒，龍腦麝香礬砂，各壹分，爲細末，唾調搽唇裏及齒上。

聖濟總錄，取白牛糞塗口中。

外臺秘要，取東行牛口中涎沫塗口中及頤上。

聖惠方，牛口中齧草絞汁灌之。

又方，大蜘蛛壹枚去足，炙焦研末，入猪乳壹合和勻，分作三服，徐徐灌之。

聖濟總錄，牛黃壹字許爲末，淡竹瀝調灌之，更以猪乳滴之尤妙。

千金方，雞屎白如棗大，棉裹以水壹合煎，分二服，一方酒研灌之。

又方，雀屎水丸麻子大，飲下貳丸。

又方，以猪乳飲之。

撮口

口撮如囊也。不乳啼低舌強唇青。面黃赤色。氣高痰盛。乃心脾之熱。受自胎中。也。若兼二便秘結。手起抽搐厥冷者。不治。

五通膏。生地黃、老生薑、葱白、萊菔子、活田螺肉、各等分。共搗爛敷臍四圍。一指厚。抱住久之。屁洩而愈。兼治臍風

聖惠方。小兒撮口。看舌上有瘡如粟米大。以指甲刮破。取蜈蚣搗汁敷之。如無生者。乾者亦可用。仍以厚艾包裹納母懷中。取大汗出而愈。兼治臍風

辰砂殭蠶散。辰砂水飛伍分。殭蠶壹錢。去絲嘴炒。蛇蛻皮壹錢炒。麝香伍分。共爲末。蜜調敷口中。

備驗方。蟬蛻貳拾枚。去頭足。全蠍柒枚。去毒。爲細末。入輕粉少許。和研乳汁。

調服。兼治
噤口

聖惠方。取蠹魚研末。每以少許塗乳令兒吮之。

又方、兼治臍風撮口取鼠負蟲搗汁灌之、按綱目曰濕生蟲俗名地雞地虱者像形也

本草綱目治撮口用蝸牛伍枚、即負殼蛭蚰也去壳研汁塗口中、兼治臍風

慎齋全書治撮口用全蠍壹箇酒塗炙爲末加入麝少許金銀花湯調服

半匙、兼治臍風

子母秘錄用夜合花枝煎濃汁拭口中并洗之

普濟方以初生荳芽研爛絞汁和乳灌少許

永類鈴方生川烏尖叁枚全足蜈蚣半條酒浸炙入麝香少許共爲末以少

許吹鼻取嚏仍以薄荷湯灌壹字、兼治臍風

金匱玉函用生甘草貳錢伍分水壹盞煎陸分温服令吐痰涎後以乳汁點

兒口中

簡便方艾葉燒灰填臍中以帛縛定隔蒜炙之候口中有艾氣可愈、兼治臍風噤口

錢氏方治撮口出白沫以艾炙口之上下肆壯鱧魚燒研酒調少許灌之仍搯兒手足

又方先炙兒兩乳中叁壯後以黑驢乳壹合以東引槐枝拾根叁寸長火煨一頭出水拭淨浸乳中取乳滴兒口內

醫通方急於顛門灸柒壯灸之不哭弔睛吐沫者不治臍風臍者小兒之命蒂也穴近三陰喜溫惡涼喜乾惡濕如斷臍不知慎重爲水濕風冷之氣所傷致兒七日之內腹脹臍突啼不吮乳四肢柔直痰壅氣塞或面青吐沫若兼口噤撮口抽搐不止者神丹莫療也

預治方小兒臍風噤口撮口等症其毒先現口中用刮口法畢以黃連半錢豆鼓貳拾肆粒甘草叁寸葱白頭叁寸用童子小便煎綿蘸拭口中

驅風散治兒腹脹臍腫啼不吮乳此臍風將發之候也急以此方治之用蘇

葉、防風、陳皮、薑炒厚樸、麩炒枳殼、煨木香、殭蠶去絲嘴酒炒、鈎藤鈎、甘草各等分、加生薑水煎服。

稀涎散治臍風已成。用此方以吐風痰、蠍尾、銅青各半錢、硃砂壹錢、膩粉壹字、麝香少許、共爲末、每服壹字、清茶調下。

盪臍法、麝香伍分、置臍上、浮萍草不拘多少、用熱水蘸半熟、蓋麝香上、又用鹽半觔炒熱、分兩袋、盪於臍上、冷更換壹袋、如此一頓飯久卽愈。

尊生書、蜈蚣壹條、蠍梢肆尾、殭蠶柒箇、瞿麥伍分、研細末、吹入鼻中、候噴嚏啼哭爲可醫、隨用薄荷湯調末服。

聖惠方、用天漿子壹枚。

按此蟲多生石榴樹上其背毛螫人俗呼刺毛

殭蠶壹枚炒、膩粉少許、研勻。

以薄荷自然汁灌之、取下毒物、名曰白龍膏。

辰砂膏、辰砂叁錢、牙硝、礞砂各壹錢、伍分、全蠍壹錢、珍珠壹錢、麝香叁分、元

明粉壹錢伍分，共爲細末，蜜研膏，塗乳頭上，令兒吮之。兼治噤口撮口驚搐

備驗方：巴豆壹粒，不去油，研爛，透明雄黃壹錢，研末和勻，每用叁厘。新汲井

水調服，下喉覺胸腹中有響聲，大便下痰，卽愈。兼治鎖肚

鄧華峯雜興方：用壁虎後半截，焙爲末，男用女乳，女用男乳，調勻入稀雞屎少許，搽舌根及牙關，仍以手蘸摩兒胸腹，取汗出甚妙。

青蒿蟲丸

紫霜丸 俱見大治方內

以上治臍風噤口撮口各方，通治三症者居多，互參採用可也。三症必先用挑口法已，然後藥之。

臍濕

或因包裹不慎，或因浴水入臍，或因尿濕浸臍，以致臍腫，浸漬不乾，曰臍濕不

治恐成臍瘡臍風

摻臍散、枯礬、龍骨煨、各貳錢、麝香少許、共爲末、乾摻臍中、

又方、紅綿灰、黃牛糞灰、乾胭脂、龍骨髮灰、各伍分、共爲細末、濕乾摻、乾清油

調敷、

又方、當歸頭、絳帛、或舊錦燒灰、胡粉各壹錢、共爲細末、入麝香少許同研乾

摻臍中、

藥墨散、黃柏、釜下墨亂髮灰各等分、共爲細末、每用少許敷之、

胡粉散、胡粉、乾薑、燒灰、白石脂、燒存性、各等分、共爲細末、時時敷臍中、

顧願經、燒絳毳敷之、

聖惠方、枯礬敷之、

又方、屋爛草爲末摻之、

活嬰方以甌帶燒灰敷之

姚和仲方用桂心炙熱熨之

千金方用猪頰骨髓拾貳條杏仁半兩研敷

聖濟總錄螻蛄甘草等分炙研爲末敷之

子母秘錄蜂房燒末敷之

活嬰方取臍蟪蟲研末敷之

外臺秘要龍骨煨研末敷之

備驗方棉繭亂髮燒灰搽之

臍瘡

臍濕成瘡甚則赤腫膿血曰臍瘡宜速療之庶不致寒濕內攻也

心鑑方本兒落下臍帶錦帛裹燒研壹錢入當歸頭末壹錢麝香少許敷臍

中、治臍濕
尤效

聖惠方、臍瘡出膿血、海螵蛸、胭脂、爲末、香油調敷之、

又方、伏龍肝末敷之、

準繩方、枯礬、龍骨煨、各半錢、研末敷之、

千金方、馬莧燒研敷之、

子母秘錄、臍瘡不合者、黃柏末敷之、

又方、臍爛成風、以杏仁去皮研敷之、

外臺秘要、蝦蟇燒灰、加牡蠣煨等分敷之、日三、

又方、兒臍不合、取車轄油脂、燒灰敷之、

活嬰方、用棉子燒灰敷之、

肘後方、乾蝦蟇燒灰、枯礬、各等分、共爲末敷之、

金黃散、川黃連、胡粉、龍骨煨各壹錢，共爲細末敷之。

異功散、龍骨煨、薄荷葉、蛇床子各貳錢，輕粉伍分，共爲末，摻臍中。

龍骨散、龍骨、輕粉各半錢，黃連壹錢，共研細摻之。

慎齋方、人參末、黃牛糞灰、乾胭脂各等分爲末，瘡濕乾摻，瘡乾香油調敷。

臍突

臍突一症，謂斷臍不如法，裹臍不致慎，而使之然者，非也。此由母驚悸鬱結，或恣食熱毒之物，兒受其氣，腹中蘊熱，無所發洩，頻頻伸引，呃呃作聲，弩氣衝臍，所以臍突腫赤，虛大可畏。此症忌敷寒藥，恐寒凝熱毒，反爲害也。若由啼哭太過，中氣弩出者，十居七八，不必治，漸自收。

二豆散、赤小豆不去皮、豆豉、天南星去皮、臍白、歛各壹錢，共爲末，用伍分水、芭蕉汁調敷臍四旁，日二次。

葱貼法、先以荊芥湯洗之、再以葱葉火上微炙、放地下出火氣、以指甲刮薄、
搭放突處卽消、

湯下、
聖惠方、胡椒、木鼈子仁各等分爲末、和杵丸如菘荳大、每服貳叁拾丸、荊芥

雷公方、白茯苓、車前子、各壹錢、陳皮、通草、各貳錢、生甘草稍貳分、水煎服、
小
便
不
通兼治

臍血

兒初生多啼叫、致臍出血者、

準繩方、白石脂炒研細末、乾摻之、不可剝揭、俟其自落、

天鈞

胎熱蘊於心脾、加以外夾風邪、內熱不得發越而成、其症壯熱痰壅、驚悸抽搐、

眼睛上翻。淚出不流。症似驚風。但目多仰視爲辨。

直指方。治日久不下。眼見白睛角弓反張聲不出者。用大蜈蚣壹條。竹刀批開。記定左右。去頭足。酥炙。又以麝香壹錢。研末。包定。每用左邊者吹左鼻。右邊者吹右鼻。各少許。不可過多。若眼未下。再吹些。須眼下乃止。

聖濟總錄。烏頭生用去皮臍。芸薹子各貳錢。共爲末。每用壹錢。新汲水調敷兒頂上。

衛生簡易方。用金牛兒。卽蟬蛻也以漿水煮一日。晒乾爲末。每日用壹字冷水調

下。

聖惠方。用壁魚兒。卽蠹魚也乾者拾箇。濕者伍箇。用乳汁和研灌之。

又方。取家桑東行根。研汁服。

又方。全蠍叁箇。硃砂如叁菴荳大。和飯爲丸。酒化服。

牛黃散、牛黃貳分、硃砂叁分、麝香半分、天竺黃壹錢、蠍梢伍分、鈎藤鈎壹錢、共爲細末、新汲水下、

鈎藤飲、鈎藤鈎叁銀、全蠍伍分、犀角伍分、羚羊角亦可、天麻伍分、生甘草貳分、水煎服、

內鈎

內鈎者、肝臟有病、外受寒冷所致、其胸膈反張、冀青潮搐、腰曲腹痛、口吐痰沫、多啼多汗、咬乳目瞪、有類驚癇、但目有紅絲、血點爲異、

乳香膏、乳香伍分、沉香壹錢、爲細末、將鮮石菖浦、鈎藤鈎、煎湯下、

心鑑方、用硃砂壹錢、乳香、煨蒜、各壹錢、爲末、研丸如黍米大、薄荷湯下、貳丸、木香丸、木香、乳香、沒藥、茴香、各伍分、炒、鈎藤鈎貳錢、全蠍壹錢、先將乳香沒藥、研勻、後入諸藥末、和畢、取大蒜少許、研細和丸、桐子大、晒乾、每服兩丸、

盤腸氣痛

其症腰曲腹痛。腸鳴失氣。口閉足冷。下利糞青。乾啼無淚。額上有汗。其致病之由。或因寒邪團結於小腸。或因妊婦憂愁思鬱。心氣蘊結。總屬寒結氣滯也。

洗肚法。全葱壹大束。煎湯洗其腹。就以熱葱熨其臍腹間。

熨臍法。見大便

直指方。用蘿蔔子炒黃研末。乳香湯服半錢。

又方。用乳香沒藥等分爲末。以木香磨水煎沸。調服壹錢。

保幼大全。莪朮半兩。用阿魏壹錢。化水浸。一日夜焙研。每服壹字。紫蘇湯下。川棟子散。木香小茴香鹽炒去鹽各壹錢。川棟子貳錢。用巴豆貳粒同炒。去

巴豆不用。共研末。酒調服。

白豆蔻散。白豆蔻砂仁青皮陳皮炙甘草香附酒炒蓬莪朮各等分。蠍尾量

加薑壹片，水煎服。

此症有兼大便不通者，參用大小便不通諸方治之。

胎驚搐

母娠時調攝乖常，醉酒嗜慾，忿怒驚撲，母有所觸，胎必感之。或外夾風邪，有傷於胎，子受母氣，以致月內壯熱，翻眼握拳，噤口咬牙，身腰強直，嘔吐驚啼，腮縮顛開，或頰赤，或面青，等候當以疎風利驚化痰，調氣主之。百日內搐抽不止者，謂之眞搐，不治。其假者，因外傷風冷所致，口中氣出熱也，可發散而愈。

噎驚散，生半夏末壹錢，皂角末半錢，吹入鼻中，少許，卽甦。一方如細辛、薄荷等分，名通關散，吹之不醒者，不治。

貼顛法，麝香壹分，蠍尾伍分，蜈蚣伍分，去足炙，牛黃叁分，青黛叁分，薄荷葉叁分，右除牛黃先搗，蠍尾等五味各取淨末，入牛黃研細，煮紅棗肉和成。

膏塗貼顙上，四邊略出一指，以手烘煖，頻頻熨之。

斗門方，硃砂新汲水塗五心最驗。

鄧華峯雜興，芭蕉汁、薄荷汁煎勻塗頭頂，留顙門塗四肢，留手足心勿塗。

經驗方，全蠍壹箇，以薄荷肆葉裹定火上炙焦，同研爲末，入硃砂、麝香少許，分作肆服，麥門冬煎湯調下。

太乙散，天漿子去壳微炒，牛膽製南星，白附子泡，天麻、防風、茯苓各貳錢，全蠍、硃砂各壹錢，麝香少許，共爲末，每服半錢，乳汁化下。一方加人參壹錢，蚯蚓膏、陳京墨貳錢，硃砂叁錢，麝香壹錢，共爲末，用蚯蚓頭上白漿和藥成丸，重柒厘，每服壹丸，用金銀器燒紅淬入乳內，將乳調藥服之。

聖惠方，五月內柳樹上蟬，去翅足炙叁分，赤芍藥叁分，黃芩貳分，水貳盞煎壹盞，溫服三四次。

直指方兼治胎痢琥珀防風各壹錢硃砂伍分爲末猪乳調壹字入口中

鎮驚散硃砂研細入牛黃少許猪乳調稀抹兒口中

備驗方治胎搐因外感風冷所成者用葱頭柒枚生薑壹片搗細攤紙上合

置掌中令熱急貼顙門以熱手熨之鼻利搐止

大青膏治胎搐因傷風得之口中氣熱呵欠煩悶手足動搖者天麻末壹分

生白附子末壹錢半蠍尾去毒生末烏稍蛇肉酒浸焙研各伍分青黛壹

錢硃砂天竺黃末各叁分蜜和成膏月中兒服菘豆大薄荷湯下

紫霜丸治傷食後發搐身温多涎多睡不思乳食見大治方保命丹見後附補編

辰砂膏見臍風

加味導赤散見小便

抱龍丸見大治方

牛黃散見天鈞

青蒿丸見大治方

胎癩

此症眼直目牽。口噤流涎。腹膨搖擗。背項反張。腰脊強勁。形如死狀。或一二時始醒。小兒之惡候也。受母氣之偏者不治。爲風邪所束者。可醫。

仁齋法。癩症方萌。耳後高骨間。必有青紋。紛紛如線。見之則爲爪破。須令血出啼叫。先得氣通爲妙。

羌活膏。用羌活獨活各伍錢。天麻。全蠍。白殭蠶。各貳錢伍分。烏蛇肉伍錢。酒浸一宿焙。麝香叁分。人參去蘆貳錢。隨宜用。共搗羅爲細末。煉蜜和膏。每服皂子大。荊芥湯化下。

天南星煎。天南星微炮。白附子。白花蛇酒浸。去皮骨。炙黃。各壹兩。以上搗羅。

爲等末、用好酒兩大盞、慢火熬、不住手攪、以酒盡爲度。次用硃砂水飛伍錢、膩粉貳錢伍分、牛黃、麝香、龍腦、各半錢、研等入膏內、和如皂子大、每服壹粒、竹瀝化下、

聖濟錄、大石榴壹枚、去頂剗空、入全蠍伍枚、黃泥固濟、煨存性、取中焦者爲末、每服半錢、防風湯下、

直指方、琥珀、硃砂、各少許、全蠍壹枚、爲末、麥冬湯調下壹字、
聖惠方、棘枝上雀窠、研其間蟲出、取汁灌之、

聖星丹、原缺
俟補

胎寒

母受寒邪、或過食生冷、與兒口冷、腹痛多啼、腸鳴下利、寒慄時發、握拳曲足、因胎中受寒所致也。

白芍藥湯、白芍藥壹錢、澤瀉捌分、甘草肆分、薄桂叁分、薑水煎、虛加人參木香、發驚加鈎藤鈎。

肘後方、治晝夜多啼、以當歸末壹小豆許、以乳汁灌之、日夜三四度。

和濟方、治胎寒腹痛、薑黃壹錢、沒藥、乳香、研去油、各貳錢、爲末、蜜丸、芡子大、每服壹貳丸、鈎藤湯下。

聖惠方、治腹痛汗出、用衣中白魚貳拾枚、絹包於兒腹上、回轉摩之、以愈爲度。

胎熱

母多驚恐、或食熱毒之物、生後旬日之間、兒多虛痰、氣急喘滿、眼閉目赤、目泡浮腫、神困呵欠、吸吸作聲、遍身壯熱、小便赤、大便閉、時驚煩、總因胎中受熱所致也。

衛生要訣，以葱涎入香油內，抹小兒五心頂背等處，善解毒涼肌。又方，以秋梨拾箇取汁，熬熱飲之。

聖惠方，瓜萋根末，乳汁調服半錢。

全幼心鑑，黑豈貳錢，生甘草壹錢，燈心柒寸，淡竹葉叁片，水煎服。

錢乙方，真牛黃壹豈大，入蜜調膏，乳汁化開，時時滴兒口中，形色不實者勿

多服，亦治胎黃

育嬰家秘，黃連炙甘草，各等分爲末，入硃砂少許和勻，生蜜調成劑，每服豈許納兒口，令咽下。

地黃膏，山梔仁，葶苈粉，各壹兩伍錢，甘草陸錢，共爲末，聽用，以生地黃壹兩伍錢，杵爛和蜜，壹兩伍錢，盛薄瓦器內，在銅銚中隔水煎成膏，與稀糊相似，候冷，入前藥末，同在搗鉢中，再研勻，丸如芡子大，每服壹丸，麥門冬湯

化

青蒿丸

見大治方內

胎黃

小兒生下。遍身面目皆黃。狀如金色。壯熱。大便難通。小便如梔汁。乳食不思。啼哭不止。此胎黃之候。皆因母受濕熱而傳於胎也。

子母秘錄。韭根搗汁。日滴鼻中。取黃水爲效。

肘後方。杜赤荳。秫米。雞屎白。各貳分。搗篩爲末。分三服。黃汁當出。

普濟方。青瓜萋焙研。每服壹錢。水半盞煎柒分。臥時服。五更瀉下黃物立愈。

正元廣和方。秦芫貳錢。人乳半鐘。水壹盞。煎半盞。去滓溫服。按秦芫宜酌減

錢乙方。見胎熱

蘇頌圖經。土瓜根。生搗汁。叁合。與服。

總微論。胡黃連、川黃連各伍錢爲末，用黃瓜壹箇，去瓢留蓋，入藥在內合定，麵裹煨熟，去麵搗丸，藁荳大量兒，強弱與之，溫水下。
地黃湯。生地黃、赤芍藥、天花粉、赤茯苓、川芎、當歸、豬苓、澤瀉、生甘草、茵陳，各等分，水煎，子母俱服之。

胎肥胎怯

兒生下，肌肉厚，遍身血紅色，彌月後漸漸羸瘦，目白睛粉紅色，五心煩熱，大便難，時時生涎，此胎肥症也。兒生下面無精光，肌肉薄，大便白水，時時哽氣多噦，目無神采，此胎怯也。古法兩症皆用浴體法，以疏通腠理。

浴體法。天麻貳錢，蠍尾去毒，硃砂各伍分，烏蛇肉，酒浸焙乾爲末，白礬各叁錢，麝香壹字，青黛叁錢，共研勻，每用叁錢，水叁碗，桃枝壹握，并葉伍柒枝，同煎至十沸，溫熱浴之，勿浴背。

赤遊風

此症或受胎中熱毒。或生後過於溫煖。以致熱毒外發。皮膚赤熱而腫。色若塗丹。遊走不定。行於遍身。故曰赤遊風。發於頭面四肢。而內歸心腹者不治。

證治準繩十二件單方。水苔、生地、黃生、菘菜。即白菜也。蒴藋。即烏頭苗也。慎火草。即景天也。

浮萍、豆豉、大黃、梔子、黃芩、硝石、豆葉。以上十二味。得一味和水搗貼之。即瘥。

簡易備驗方。治十種丹瘤。一治從頂頭起腫。先用葱白研取自然汁塗之。

二從頭上紅腫痛。用赤小豆末、雞子清調抹。三從面起赤腫。用灶心土。

雞子清調搽。四從背起赤點。用桑白皮研末、羊脂調搽。五從兩臂黃。

色。用柳木燒灰、水調敷。六從兩脅虛腫。用生鐵屑和豬糞調敷。七從。

臍上起黃腫。用檳榔為末、米醋調敷。八從兩腳赤腫。用乳香末、羊脂調。

敷 九從兩腳有赤白點，用猪槽下土，麻油調敷。十從陰上起黃腫，用屋漏處土，羊脂調敷。

千金方取屋塵和臘猪油敷之。

又方用唾和胡粉，從外至內敷之。

又方取煨鐵屑研末，猪脂和敷之。

又方用大豆煎汁塗之。

又方治丹毒，從兩股走及陰頭，用李根燒爲末，以田中流水和塗之。

又方水煎棘根，洗之。

又方治丹毒從髀起，流下陰頭赤腫出血，用鯽魚肉伍合，赤小豆貳合，搗勻

入水和敷之。

衛生簡易方取向陽燕窩土爲末，雞子白和之。

陳氏本草燒鐵淬水飲壹合

子母秘錄用藍靛敷之

楊氏產乳方治丹毒從兩股兩脅起用景天草搗如泥入眞珠末塗之乾卽

易

全幼心鑑菘荳伍錢大黃貳錢爲末用薄荷汁入蜜調敷

又方丹瘤初發急以截散風截之白芷寒水石卽石膏爲末生葱汁調敷

譚氏方胡荽汁塗之

廣利方用馬莧搗塗

簡要方以生萊菔汁塗之亦可灌服數匙更以萊菔渣絹包烘煖熨之

又方以水芭蕉根搗汁塗之

刪繁方以蟻螞蟲搗塗之

奇方用竈馬

即俗呼樟木蟲

在竈內尋出活的去頭以白漿擦上不過數次即愈

本草綱目猪肉切片貼之

修真秘旨用蓖麻子伍箇去皮研入麴壹匙水調塗之

外科精義以木鼈子仁研如泥醋調敷之一日三五次

神功散用黃柏生草烏各等分爲末以漱口水調敷頻以漱口水潤之

砭血法口吮毒血各聚一處用細磁器擊碎取鋒芒者將筋頭擘開夾住以線縛定兩指輕撮筋梢令磁鋒對聚血處再用筋壹根頻擊刺出毒血砭後毒甚者以神功散敷之毒輕者砭後不可用恐皮膚既破草烏能作痛也如患在頭者不用砭法祇宜臥針倒挑患處出毒血則愈百日內者忌砭血以其肌肉難任也

夜啼

其症有二。一曰脾寒。一曰心熱。如面色青白。手腹俱冷。不欲吮乳。曲腰不伸者。脾寒也。面赤唇紅。身腹俱熱。小便不利。煩躁多啼者。心熱也。分別治之。

本草綱目。燈花貳叁顆。燈心湯調抹乳上。令兒吮之。

簡易方。用燈草灰。辰砂末少許。塗乳。令兒吮之。

又方。燈花柒枚。礪砂壹字。辰砂少許。蜜調塗兒唇上。

全幼心鑑。蟬蛻拾玖箇。去前截。用後截爲末。分四服。鈎藤鈎湯下。或薄荷湯下之。

塗乳方。真牛黃。飛過辰砂極細末。各半分。塗兒舌上。

聖惠方。以乳香壹錢。燈花柒枚。爲末。每服半字。乳汁下。

又方。以猪矢燒灰。淋汁浴兒。并以少許服之。

聖濟總錄。劉寄奴貳錢。地龍炒壹條。甘草壹寸。水煎服。

生生編用青黛量兒大小研服之

又方用黑牽牛末壹錢水調敷臍下以上治熱方

總驗方竈心土貳兩研雞子壹枚和水調勻塗兒五心及頂門

普濟方以伏龍肝貳錢硃砂壹錢麝香少許蜜丸葶苈大每服伍丸桃符湯下

又方硫黃貳錢半鉛丹貳兩研勻瓶固煨過埋地中七日取出飯丸黍米大每服貳丸冷水下按此方不可輕用

本草綱目取梳頭垢少許服之以上治脾寒方

楊氏方用淡豆鼓竈中土蚯蚓糞入醋杵搗和丸如雞卵大摩兒頂心顙門及手足心并臍上下各七次擘開有毛棄之

聖濟總錄以馬蹄末敷乳上飲之

姚和仲方取虎眼壹隻爲散以竹瀝調少許與喫以上通治寒熱方

集簡方取死尸場上土置枕邊

聖惠方取明鏡掛床腳下毋令人知

拾遺方用井口邊草私著蓆下勿令母知

生生編用本兒初穿毛衫放瓶內自不哭也

日華本草取雞窠中草安蓆下勿令母知

本草綱目取豬頸下毛絳囊盛繫兒背上

食療本草取牛屎壹塊安蓆下勿令母知

經驗方摺父之褲致兒作枕

又方雞屎塗兒臍中男雄女雌

又方硃書田字於兒臍下

又方，硃書甲寅二字貼床頭。

又方，五倍子爲末，津唾調填臍內，書小兒父名貼之。

又方，仙人杖取叁尺，安兒睡處，勿使人知，此杖卽筭欲成時立死者。

又法，用紙寫天蒼蒼地皇皇，我家有箇夜啼郎，來往君子念一遍，小兒睡到

大天光，書此貼此，總不要四眼見，須貼在大路旁，人易見之處。

又法，用柴頭壹箇，長肆伍寸，削平一面，硃砂寫云撥火杖，差來捉神將捉著

夜啼鬼，打死不要放，急急如律令。

以上厭
勝法

鵝口

初生口內白屑滿舌，拭去復生，重則滿口白斑，時吐白沫，咽間疊疊腫起，難乳夜啼，心脾二經胎熱上攻所致。

洗法，急以毛青布裹指頭，蘸薄荷汁，或甘草、黃連，各壹錢，煎汁，或新汲水，拭淨白屑，如不脫，選方治之。

集效方。天南星醋調，敷腳心，乾則潤之，兼治重睛、重翳。又方，吳茱萸末、米醋調敷腳心。

聖惠方，以白芨末、乳汁調敷足心。

四寶丹，用雄黃叁錢，硼砂壹錢，甘草壹錢，冰片貳分半，研末，摻之，或用蜜水調敷之。

青液散，青黛、樸硝，各壹錢，龍腦壹字，硼砂少許，共研細末，鵝翎挑少許，掃舌上。

大千方，用黃丹研細，竹瀝調塗口中，其白點卽落，一日塗三四次，再用辰砂、益元散、滑石、陸錢、甘草壹錢，辰砂少許，燈心湯調下。

又方、用鵝糞泡湯拭洗口內、

子母秘錄、用桑白皮汁、和胡粉敷之、

活幼新書、用雞胫黃皮燒末、和水服之、

姚和仲方、以馬牙硝擦舌上、日五度、

普濟方、白枯礬壹錢、硃砂貳分、爲末、以少許敷之、日三次、

又方、用赤小荳末、米醋和塗之、

聖惠方、甌帶燒灰、敷舌下、兼治重舌

集簡方、以坯子胭脂乳汁調塗之、男用女乳、女用男乳、

千金方、柘根伍觔、剉水伍升、煮叁升、去渣煎取伍合、頻塗之、無柘根、弓材亦

可、兼治重舌

正傳方、白楊樹枝、燒取灑塗之、

簡易備驗方、白殭蠶炒黃爲末、蜜和敷之、

永類鈴方、鵝口瘡自内生出者可治、自外生入者不可治、用食草白鵝下清糞、濾汁入沙糖少許、搽之、或用雄鵝糞、眠倒者燒灰、入麝香少許搽之、

懸癰

初生小兒上腭腫起。或如蘆穉盛水之狀。或如紫李墜下抵舌。名曰懸癰。胎中熱毒也。急宜刺破。癰頭令泄去青黃赤汁。再生再刺。刺破後以鹽湯洗淨。用藥搽之。

一字散、用硃砂、硼砂、各伍分、龍腦、樸硝、各壹字、共研末、蜜調搽口內、
大千方、食鹽煨研、枯礬各等分、研細水調、以筋頭蘸點患處、

重腭

上腭層疊腫硬者。急宜長針刺之。甚則上腭成瘡如黃粟。口中腥臭。皆脾經蘊

熱也。

必效方。先以蚌水布蘸絞淨，以一字散方見懸癰搽之。取蚌水法，將蚌洗淨打碎。

用濕棉布濾清水用之，不可用疎夏布，恐布孔疎，蚌中螞蝗蟲濾在水中。

也。此方通治口舌咽喉諸熱症甚效。

天南星散。以天南星生去皮臍，研細末，用醋調塗。男左女右腳心，厚皮紙貼。

如乾，再用醋潤之。

聖惠方。用蛇蛻灰，醋調敷之。

集效方。敷法。見鵝口。

重齦

初生兒貼著齒齦。有物脹起者是也。由脾胃蘊熱所致。急以針刺去腫處惡血。以鹽湯洗之。再生再刺。治參懸癰重腭法。

錢氏方、人中白、煨研末、擦之、

備驗方、桑樹上、用斧斫二三下、少時、其漿流出、取搽腫處、

集要方、白芷壹錢、硃砂伍分、研末擦齦上、

集效方、敷法、見鵝口

牙關蟲

初生兒、喫乳不穩、壯熱色赤、鼻孔黃、急看牙關、如有蟲似蝸牛、又似黃頭白蜂、螺、如法治之、卽瘥、

証治準繩方、用竹瀝半合、和少許牛黃、服瘥、

又方、用猪肉拭口、其蟲卽去、

吐舌

吐舌者、伸長而收緩也、面赤煩啼、口渴尿赤、因心經有熱也、

導赤散、木通伍分、生地黃伍錢、黃連叁分、甘草梢伍分、黑山梔壹錢伍分、淡竹葉壹錢、燈心伍拾寸、煎服。

大千方以牛黃少許塗舌上，卽止，或點冰片少許，亦效。

弄舌

舌如蛇舐，左右上下伸縮動搖，謂之弄舌。因心脾有熱，以致唇焦舌乾，煩啼便穢也。

慎齋全書用川黃連煎湯，細細與服，輕者燈心湯亦可。並治吐舌

瀉黃散用霍香葉、山梔子、熟石膏、防風、生甘草、燈心、竹葉煎湯，或兼導赤散。見吐各半服。

重舌

心脾蘊熱，則氣血俱盛，腫附舌根。其狀如舌下又有一小舌，故曰重舌也。當以

針刺之出血然後與藥。用線針刺患上向旁挑之。不可深刺正中主筋之上也。
聖惠方元精石貳兩牛黃硃砂冰片各壹分共研末以針刺舌上去血鹽湯洗摻末敷之。

又方伏龍肝末牛蒡子汁調塗之。

又方皂角刺灰入樸硝或腦子少許洗口摻入舌下涎出自消。

又方桑根白皮取入土者搗汁飲之。

千金方取釜下土和苦酒塗之。

又方黃柏浸苦竹瀝點之。

兼治木舌

又方衣魚燒灰敷舌上。

又方取三家屠肉切指大摩舌上兒立啼。

子母秘錄木蘭皮即木蘭樹皮也壹尺廣肆寸削去粗皮入醋壹升漬汁噉之。

又方、蟻螂蟲末、唾和敷舌上。

簡易濟衆方、以亂髮燒灰半錢、敷舌下、

普濟方、以竹瀝同芒硝點舌上、

本草綱目、半夏和醋煎洗之、木舌同治

聖惠方、

千金方、俱見鵝口

木舌

舌尖腫大塞滿口中、硬不能轉動、故名木舌也。由心脾積熱上沖而成。急刺出血。若舌胎堅硬。藥味不得入者、用竹刀輕輕刮去硬胎。拭淨然後用藥。此症不可用手按之。按則舌根乃損。長成言語不正。

吹鼻法、舌腫滿口、或吐出在外、難以納藥者、用殭蠶牙皂、俱製過爲末、用少

許吹鼻中口自開頑痰自出用筋繞絲棉蘸甘草湯潤其舌然後用藥敷之

大生要旨用葶麻子肉細爛以棉紙取油將紙摺成條點火吹滅以烟薰之即消若舌下有如螻蛄或如臥蠶者急於腫處斫去血仍用釜底灰以鹽醋調敷或井水亦可脫去再敷

寒冰散用生石膏冰片少許共研末敷舌上如出血石膏炒焦用直指方以蜀葵花壹錢黃丹伍分共爲末敷之

本草綱目以半夏貳拾枚水煮過再炮片時乘熱以酒壹升浸之密封良久熱漱冷即吐之

千金方舌長大塞口取鯉魚肉切片貼舌上

又方蛇蛻燒灰乳和服少許

局方用蒲黃末、頻刷舌上自消。

大千方、蜜炙黃連、白殭蠶、各等分、共研末、搽舌上。

又方、生薑切片、蘸硼砂擦之。

又方、冬青葉、煎濃汁浸之。

又方、百草霜、海鹽、各等分、研末、井華水調下。

必效方、皂礬不拘多少、新瓦上火煨變紅色、放地上候冷、研細末擦舌上。

千金方點法、見重舌

膜舌

初生小兒、有白膜裹舌、或遍舌根、急以指甲刺破、出血、否則其兒必啞。

姚和仲方、刮破舌膜、令出血、卽以燒白礬半菴荳許、敷之、若血出不止、燒髮灰、搽之、或同豬脂塗之。

含腮

小兒初生時。腮內如米豆大一小瘡。次日漸大。蝕破腮頰。故名含腮。若不早治。破透難療。

二金散。用雞內金、鬱金各等分。研細末。先用鹽湯洗淨吹之。

疔腮

兒初生。兩腮腫硬有核。或在一邊。名曰疔腮。因妊恣食厚味。或鬱怒不解。以致鬱熱在內。兒受之以成此症。不治恐成腮癰。

敷疔腮法。桑柴灰少許。入雄雞冠血。叁肆滴。加鹽。適壹匙。和勻。頻搽患處。

又方。皂角貳兩。去核。天南星貳錢。生用。糯米壹合。爲細末。薑汁調敷。

又方。芙蓉葉。不拘多少。搗敷之。以帛紮定。一日一換。

神驗方。以赤小豆爲細末。新汲水調敷。赤腫處。乾則再敷。

大、全、方、大黃末加薑汁少許敷之、空頂透氣。

又、方、霜後絲瓜煨存性、豬膽汁調敷、

又、方、黃柏鉛粉各等分、研勻、涼水調敷、

又、方、染坊靛花頻敷之、

又、方、肥皂同沙糖搗敷、紙蓋留頂出氣、

又、方、豬膽汁入生薑汁少許、和勻、磨陳京墨敷之、

又、方、扁柏葉搗汁、調蚯蚓泥搽上、

又、方、用百合壹兩大貝母山芝蔴根去皮元明粉各壹錢、銀硃柒分、白麵少許、同搗敷、

螳螂子

大生要旨曰。邇年來吳越間。新產月內小兒。有口噤不乳。啼聲難出。兩腮腫硬。

名謂螳螂子。熟諳穩婆將利刃於口內兩腮剖開。檢出堅光惡肉。形頗肖桑螵蛸傷處。據云搽以胎骨珍珠散。兒便能乳而愈。若割治少遲時刻。則腫延喉鼻。不可救矣。亦有不諳割壞者。余具目睹。考之方書。從無此說。詢之幼科專家。亦盡茫然。舍刀法竟無方藥。不知病始何時。割自何人。因病可傷生。爲害甚速。附識於此。以俟知者。徐靈胎曰。自古無螳螂子之病。凡小兒蒸變之候。每有口內微腫惡乳之時。名曰妬乳。不治自愈。或不能坐視。以藥塗口亦易愈。近日濱海妖婦造割螳螂子之法。以騙人取利。强者幸愈。弱者多死。受其害者甚多也。蓋小兒兩頰頤內有內外皮兩層。中空處有脂膜一塊。人人皆然。割去復生。妖婦以此惑人。人見果有螳螂子者。遂相信不疑。死而不悔。深可憐憫。今爲之大聲疾呼。慎勿被其愚而受其害也。徐氏此說實爲近理。閱外科全生集已有治法。依方施治無不效者。烏用割爲慎之戒之。

搽口方，青黛壹錢，元明粉叁錢，硼砂壹錢，薄荷伍分，冰片壹分，共研細末，和勻擦兩頤內，日用四五次，立愈。

全生集，用生地黃伍錢，大黃壹錢，陳酒浸，取出，共搗爛，塗兒足心，男左女右，用絹縛好，乾卽易愈，乃止。

爛眼

胎中蘊熱，生後毒熱上攻於目，以致痛癢難睜，胞邊赤爛，此名爛眼。

簡易備驗方，小紅棗貳箇去核，入明礬裝滿，濕紙包，裹火煨，候礬化去紙，同黃連壹錢，水壹鐘，煎半鐘，去渣澄清，將薄棉紙浮藥水上，渣紙上清水洗，每洗一次，必易一紙。

又方，杏仁叁粒，去皮尖搗爛，加銅綠黃豆大壹塊，爲末和勻，將新青絹包此一味，用井水壹酒盞，浸片時，待水有綠色，不時洗眼，至一二日後自愈，須

先用皮硝煎水洗過，再用此方洗之。

衛生要訣，用豬膽汁和鹽點之。

又方，桑葉紙卷燒烟薰鼻。

赤眼

兒初生赤眼，此胎熱也。或因洗浴不潔，穢汁浸眼眦中。至長不痊，名胎赤眼。

心鑑方，胡黃連末，茶調敷手足心。

真金散，黃連、黃柏、當歸、赤芍、杏仁，用乳汁浸一宿，灑乾爲極細末，用生地黃汁調點之，更用荊芥煎湯溫洗。

普濟方，羊肝切薄片，井水浸貼。

又方，小兒吐出蛔蟲貳條，磁蓋盛之，紙封口，埋濕地五日，取出化爲水，磁瓶收貯，每日用銅筋點之。

聖濟方銅綠壹分。蜜半兩。於蚌壳相和。每夜臥時。水洗眼。炙熱點之。能斷根。古今錄驗方。淡竹瀝點之。或入人乳效。

小品方人乳浸黃柏點之。

濟急仙方。杏仁壓油壹合。食鹽壹錢。入石器中。以柳枝壹錢緊束。研至色黑。以熟艾壹團安碗內。燒烘之。令氣透。火盡卽成。每點少許。入兩眥甚妙。本事方大黃。白礬。各等分。爲末。同冷水調作罨子。貼眼立效。

血眼

初生艱難。血浸眦眶。遂濺滲其睛。以致瞳神不見。或上下弦爛。

全幼心鑑。杏仁貳枚。去皮尖嚼。乳汁叁伍匙。入膩粉少許。蒸熟。絹包頻點。重者加黃連樸硝。

大千方。治兒百日內乳嗽不愈。以致血脈貫瞳。兩眶紫黑。或眼白珠紅赤如

血。亦名血眼。當用生地、黑豆，共研成膏，掩於眼上，則眶黑自消，血隨淚出。
血淚

小兒雙目流血。乃胎火胎熱所致。宜涼肝導赤，兼與鯽魚煨湯喂之。自效。

涼肝導赤湯：生地黃叁錢、丹皮貳錢、澤瀉、赤茯苓、炒山梔、人中黃、赤芍、木通，各壹錢，燈心、念寸爲引，水煎服。

活幼新書：兒目濇不開，或出血者，方見目不開

鼻塞鼻乾鼻涕鼻齜

小兒初生忽然鼻塞，不能吮乳。開口呼吸者，或因乳母夜睡，鼻息吹兒顙門，或因風寒外入，停滯鼻閒，則成鼻塞。或火升熱鬱，則成鼻乾。或津液不收，則多涕。濃涕結聚，則成鼻齜。

葱薑貼法：葱頭柒枚，生薑壹片，共搗爛攤紙上，置掌中合待溫，貼於顙門，其

邪卽解，搗去後，仍用絹緞寸餘塗以麵糊，仍貼額門，永無傷風之患。

通關散，香附子、川芎、荊芥穗、細辛葉、猪牙皂角、殭蠶各等分，入葱白搗成膏。

用紅綿攤貼額門。

葱涎膏，全葱研爛，將猪牙皂角爲末，和勻成膏，貼額門。

效得方，天南星炮爲末，水調貼額門，手熨之。

聖惠方，零陵香壹兩，羊髓叁兩，銚內慢火熬成膏，去滓，日摩背上三四次。

外臺秘要，醞醐叁合，木香、零陵香各肆分，湯煎成膏，以塗額上，并塞鼻中。

大千方，通草、北細辛各等分研末，以棉裹藥，如棗核大，納入鼻中，一日二次。

以上治
鼻塞

普濟方，治鼻乾，用黃米粉、生礬各壹兩，每以壹錢調貼額上，日二次。

又方，治鼻流濃涕，兼治鼻乾、枯礬、血餘、灰等分爲末，青魚膽汁拌爲餅，陰乾。

研細吹鼻中

簡易備驗方。治鼻齷。瓜蒂、藜蘆各壹分。皂角半分。麝香少許。爲細末。頻吹之。聖惠方。治鼻齷有熱者。龍腦半錢。瓜蒂拾肆箇。赤小荳叁拾粒。黃連叁大莖。去鬚。共研末。吹鼻中。

膚裂血出

或受胎熱。或過溫煖。內熱外洩也。

尊生書。以唾津磨鐵繡敷之。卽止。

肚皮青黑

小兒百晬內。忽然肚皮青黑。乃氣血失養。風寒乘之。危惡之候也。百晬外亦有此症。

簡易備驗方。以好燒酒和胡粉敷之。

胡粉卽婦人搽面之鉛粉也。

保幼大全。大青爲末，納口中，以無灰酒送下。

灸法。灸臍左右上下各半寸，并鳩尾骨壹寸，凡五處，各叁壯。

遍身腫泡

小兒初生，遍身發泡如魚脬，光如水晶，破則成水，流滲又生者，胎毒也。

急救方。蜜陀僧研末，摻壓之，內服蘇合丸。

見大治方

體如水晶

初生小兒，胸腹忽然如水晶色，臟腑皆見，俗名蝦蟇瘟。

大生要旨。熨法取人蝦蟇陸隻，將四脚紮起，以蝦蟇肚皮，在水晶色處，撫摩多次，置兒臍上，再用第貳隻，如前法，更換陸隻，其病卽痊。蝦蟇眼皮內有蟾酥，須防其迸出射人，以絹遮其眼額，用畢將蝦蟇放野池邊，不可害其生也。

遍體如鱗

芽兒皮膚如蛇皮鱗甲之狀。由於氣血否澁。亦曰胎垢。又曰蛇體。

保幼大全用白殭蠶去絲嘴爲末煎湯浴之一加蛇蛻。

腎縮入腹

一臘之內腎縮入腹。乃初生受寒所致。

聖惠方用吳茱萸硫黃各半兩。同大蒜研塗其腹。仍以蛇床子烟薰之。

陰囊腫墜

初生陰囊光腫墜下不收。有皮潰而核欲墜者。

小品必效方用紫蘇爲末。患處濕則乾摻之。乾則香油調塗之。神效。

大小便出血

兒生一臘。大小便出血。乃胎中受母蘊熱之氣所致。

全幼心鑑、生地黄汁伍柒匙、無灰酒半匙、蜜半匙、和服、

簡易備驗方、生蒲黃、油頭髮、燒灰、各壹錢、爲末、或生地黄汁、或米飲調服、

又方、治大便出血、鼈頭壹枚、炙令黃黑爲末、米飲下、

又方、治小便出血、小甘草壹錢、炙黑研末、生地黄汁調服之、

手拳不展

小兒所受肝氣怯弱、致筋脈攣縮、兩手伸展無力也。

薏苡丹、用薏苡仁、湯浸去皮研細、當歸酒洗焙、秦艽、防風、棗仁炒、羌活、各等分、共爲細末、如龍眼大、每服壹粒、以荊芥湯入麝香少許、化下、

衛生要訣、用急性子、卽鳳仙子也爲末、酒煎洗一日、次日以當歸鈎藤水煎洗如

法互易

又方、用烏雀爪燒灰、酒調、擦手心、

脚拳不展附足指向後

兒在胞。母臟腑有積冷。或爲風邪所乘。生後氣血未榮。故脚指拳縮不展。或因母娠時。因病不能行步。日惟盤坐。子母一氣相通。形隨氣化。故亦如是。

必效方海桐皮、當歸、人參、牛膝、酒炒、牡丹皮、熟地黃、補骨脂、獨活、各等分、共爲末、和勻、每服壹錢、用蔥白叁寸、薑壹片、煎湯調服、

衛生要訣、用牛膝叁觔、黃酒拾伍觔、煎叁炷、香、日以酒洗足、

又方、用轎夫鞮底燒灰、每日酒調服之、

大生要旨、治足指向後、用軟綿捲如棍子、紮兒膝後灣內、再用木瓜湯、常常洗熨之、日久筋長舒展、則自能伸也、

胎毒

胎毒者、非尋常瘡癬比也。父母楊梅蘊毒所遺。或房術熱藥所感。中於先天。有

生之初身現紅點。或因熱湯洗浴。烘薰衣物。外熱觸動。內毒暴發。忽然頭面腹背手足等處。斑爛膿血。最難救治。若早治得宜。可保十之三四。切勿惟從外治。致毒內攻。卒成不救也。

外科正宗治小兒受父母霉調。赤剝斑爛。以土茯苓熬濃汁。調人中黃末。每日數次。共服錢許爲妙。用後用幼科良方外搽法。治之宜早。遲則遍身皆瘡。百不一治矣。

清涼膏。見初生無皮

陳遠公治法。小兒初生。或半歲。或一二歲。胎受惡毒。身發大瘡。內治。用金銀花貳兩。生甘草。天花粉。黃柏。錦地。羅各叁錢。人參貳錢。水煎服。貳劑。外治。用蝸牛。生甘草。兒茶。樟腦。黃丹。水粉。枯礬。各叁錢。冰片。輕粉。各壹錢。地龍。糞伍錢。麝香叁分。共爲細末。麻油調敷。輕者單用煎方。重者內外合治。無

不可救也

按煎方分兩宜酌減

幼科良方內用真西黃叁分、硃砂水飛雄黃各柒分、乳香去油、沒藥去油、各伍分、麝香壹分、山慈姑壹錢、共爲末、蜜丸重叁分、金銀花湯、每日調服壹丸、取愈、外用搽方白蘆甘石、煨過淬入黃連汁內叁次、童便內肆次、壹兩赤石脂煨壹兩、紫甘蔗皮燒灰存性、兒茶各伍錢、黃柏將豬膽汁塗炙柒次、柒錢、真葦荳粉炒叁錢、冰片伍分、共研細、用麻油入雞蛋白黃壹枚、煎黑去滓候冷、調搽取愈、

大千方以鼈甲煨存性研細、麻油調敷、

又方兒茶伍錢焙研、獐豬膽汁調勻、煎滾冷定、將瘡用甘草湯洗淨、敷之、秘方鮮半邊蓮搗汁掃上、以渣煎湯洗之、

又方以慎火草搗汁搽之、

胎瘡

小兒胎瘡。因娠婦飲食之毒。七情之火。兒受其氣。發而爲毒。或靨或片。頭面腹背四肢。發無定所。雖較胎毒爲輕。然乳母必當戒發物。當忌慾後乳子。不然。非易言愈也。

湯氏方。春用柳條荆芥。夏用棗葉槐枝。秋冬用苦參。煎湯洗胎瘡癬。

尊生書。乳母服藥方。苦參貳錢。羌活捌分。甘草肆分。連翹防風。荆芥。牛蒡子。

金銀花。各壹錢。共和水煎服十劑。

簡易備驗方。生甘草。金銀花。各壹兩。真牛黃壹錢。爲末。每服貳叁分。乳汁調下。

得效方。黃芩黃連。白礬。俱生用。雄黃。各伍錢。松香貳錢。爲末。癢甚加銅錄貳錢。乾摻患處。或用香油調敷之。疥瘡宜加枯礬叁錢。

尊生書不拘何處以桐油調胡粉塗之

又方用大黃捌兩甘草肆兩當歸貳兩樸硝貳兩共煎濃汁以青布作小衫二件藥汁煮收入陰乾早晚換服再煮以愈爲度

經驗良方治胎瘡滿頭用水邊烏柏樹根晒研入雄黃末少許香油調搽外臺祕要以葵根燒末敷之

必效方松香貳兩蛤粉伍錢青黛貳錢半爲末用柏燭油敷調或乾摻之或加輕粉枯礬各叁錢

胎癩

胎中受毒落草受風致生妳癩或起眉端或生頭頂延及遍身早治易愈

保幼大全用藁本煎湯浴之并以浣衣又方以殭蠶不拘多少去嘴研末煎湯浴之

直指方以猪脂和輕粉抹之。

千金方蛇床子杵末和猪脂塗之。

聖惠方先以鹽葱湯洗淨用桑木蛀屑燒存性入輕粉等分香油和敷之。
外臺祕要用蟾酥燒灰猪脂和敷。

儒門事親用白膠香黃柏輕粉等分爲末羊骨髓和敷。

奇方纂類先用粗碗一隻以厚綿紙糊口刺眼一二十將細米糠壹合高堆在紙上中開一窩將炭火種放在內燃著糠候燒勿至紙卽去糠取碗內烟油用麻絲刮破癬搽之。

文蛤散治搔癢不絕者用文蛤肆兩輕粉伍錢點紅川椒貳兩先將文蛤打細塊鍋內炒黃色次下川椒同炒黑色烟起爲度入罐內封口存性次日入輕粉研爲細末香油調搽。

烏雲膏用松香貳兩、硫黃壹兩、研勻、香油拌如糊、攤毛青布上半指厚、捲緊成條、用線密紮、再用香油泡一日、取出刮去浮油、以火點著、一頭朝下、用碗接之、布灰陸續翦去、將滴下油浸冷水中一宿、出火毒搽之、

紅絲瘡

紅絲瘡者、雖非丹胗、其毒實同、多生於兩手中指上、男左女右、則尤甚也、其狀但一水泡、清澄光瑩、如小雞頭大、其底下濺濺然、數十小針孔、不痒不痛、都無妨碍、邊旁有一絲脈、如紅絲、隱隱在皮裏、其行甚速、循臂而上、過肘則危、至心則死、人多不知此病、芽兒患此、害命父母、尚以爲死於急驚、豈不冤哉、有此症者、則以針迎頭挑斷、出血、病者知痛、則可救、若挑至骨、亦無生血者、不治、

救急良方、挑破出血後、或挖耳塞封之、或嚼白梅封之、或用葱白搗爛敷上、加棉紙覆之、或嚼浮萍草敷之、絲卽不行而愈、

聖惠方。急就其泡上。灼艾數十壯。仍於絲上數處挑斷。得生血乃生。

猴疔瘡

猴疔者。狀如圓癰。色紅。從鬢而起。漸及遍身。四圍皮脫。中露赤肉。若猴之狀。乃胎中毒邪。畜於腎臟而發。不急治。必死。此症切忌洗浴。只用軟綿帛蘸甘草湯揩淨用藥。

醫通方。大川連生甘草各陸分。乳香沒藥並炙。雄黃水飛各肆分。青黛研淨。硃砂水飛各分半。西牛黃壹分各爲細末。和勻。每服壹分伍厘。蜜調。燈心湯下。日三服。夜二服。外用淨青黛貳錢。黃柏微炒。閉口連翹炒。黑人中白。火煨醋淬。各壹錢。土貝母去心炒。褐色伍錢。共爲末。和勻。臨用。入西牛黃。冰片各伍分。麻油調敷。神效。

屢試神效

按用蟹壳瓦上炙黑。橄欖核燒存性。等分。研末。加冰片少許。將甘草湯拭淨。淨子清調塗。

二粉散、葶苈粉壹兩、標硃壹錢、冰片叁分、輕粉壹分伍厘、共爲細末、將金汁調、鵝毛蘸敷上、如無金汁、雪水亦可、或用燈心甘草湯亦可、

胎瘤

兒初生、頭上胸乳間腫起、大如饅頭、小如梅李、此胎中蘊熱、更兼血淤凝滯而成、須候小兒滿月以外、方可用針刺破、放出赤荳汁、或濃汁、其腫卽消、若滿月後生者、必待膿鼓熟透再針、內服五福化毒丹、化毒丹方原本缺今彙集驗良方補後大治方末

背窠

小兒初生、背上有大孔窠一二箇、其內有膜、完護臟腑者得生、如無膜、露見臟腑者、卽死無救、如有膜者、以補中益氣湯與產母服之、兒自能長完、

補中益氣湯、用人參、黃芪、各捌分、白朮、甘草、陳皮、各伍分、升麻、柴胡、各叁分、當歸伍分、水煎服、

溼尻瘡

初生小兒手足頤下。頰肢窩腿了內。濕熱之氣。蘊積溼爛成尻。此乃乳母看顧不周所致。不可用他藥。只用伏龍肝一味。不拘多少研細乾摻。以紙隔之。

大治方

青蒿丸。治小兒百病。白露節前。取青蒿莖內青蟲柒條。飛淨硃砂壹錢。輕粉伍分。研不見星。同蟲研極爛丸如黍米大。每服柒丸。百晬以外服拾肆丸。將人乳研開塗兒口中。與乳過下。

紫霜丸。代赭石壹兩。火煨醋淬三五次。研細末。赤石脂壹兩。杏仁陸拾粒。去皮尖研。巴豆叁拾粒。去油膜。共爲末。飯丸如麻子大。日服三丸。開水下。

黑白散。黑丑白丑俱半。生半炒。大黃檳榔。陳皮各伍錢。甘草叁錢。元明粉貳錢。除檳榔不見火。餘五味焙研細。合檳榔末。元明粉和勻。每服伍分。蜜湯

調服。

蘇合香丸、蘇合香油伍錢，入安息香內。安息香壹兩，另爲末，用無灰酒半觔熬膏。白檀香、青木香、丁香、沉香、華撥、香附子、訶子煨取肉、烏犀尖、鎊、硃砂各一兩。薰陸、香片腦各伍錢，麝香、柒錢半，共爲末。入安息香膏，煉蜜和劑。如灰實大，用開水下。

琥珀抱龍丸、真琥珀、天竺黃、檀香、細剉人參、白茯苓各壹兩，粉炒叁兩去節。枳壳、枳實、麩炒各壹兩，硃砂伍錢。飛陳膽星壹兩，山藥壹觔。金薄百片，研極細，新汲水爲丸，硃砂爲衣。梧子大，每服壹丸，薄荷湯下。

五福化毒丹、犀角叁錢、桔梗壹兩、赤茯苓伍錢、牛蒡子炒伍錢、生地伍錢、生甘草炒叁錢、朴硝叁錢、連翹陸錢、元參陸錢、青黛貳錢、蜜丸。龍眼大，每丸重壹錢，薄荷湯下。

幼科易知錄補編

小兒雜症，病機紛如，非若初生胎疾，稟母氣之偏者居多，尙易捉摸也。然其致病之由，不外乎風寒暑濕燥火食痰，治以疏解通利，輕症易痊，茲選平穩簡易之方，以治初起之候。至于病深傳變，雖國工尙難之，非病家所能擇方圖治也，故不詳其說，至瘡瘍之治，亦具其大略而已。

雜症類

風寒

開關散，治客邪初感，鼻塞垂涕，噴嚏不爽，用連鬚葱白頭柒枚，生薑壹塊，猪角皂末少許，共搗爛攤紙上，置掌中合溫，貼於顙門，其邪卽解。

直指方，治發熱不拘風寒飲食，時行痘疹，並宜用之，以葱涎入香油內，手指

蘸油、摩擦小兒五心頭、面頂背四肢諸處、最能解毒涼肌、

景岳方、治外感症、兼傷乳食、胸腹脹滿作痛、以連鬚葱白頭、老生薑、各肆兩、

生蘿蔔捌兩、

如無以蘿蔔子肆兩代之

三味、共搗爛炒熱、用布作兩包輪換、罩熨胸腹

痛處、久之無不豁然自開、汗出而愈、如數次炒乾、則以酒潤之、但不宜太

熱、恐烙傷皮膚也、

普濟方、治感冒風寒、用紫蘇半觔煎濃湯、將長大手巾摺數層、蘸透略絞乾、

乘熱攤胸前至肚上及臍下、用手在中上旋摩、冷則再換數次、得汗則外

邪盡解、且暖氣透腹、或有積滯、亦自下矣、

解表通治方、豆豉貳錢、製半夏、陳皮、各壹錢、茯苓壹錢、甘草貳分、連鬚葱白

叁莖、生薑叁片、水煎服、如無汗、加羌活、防風、各壹錢、煩渴、加葛根壹錢、燈

心叁拾寸、天花粉貳錢、惡寒、加桂枝叁分、頭痛、加川芎、白芷、各伍分、咳嗽、

加杏仁、枳壳各壹錢，痰多加竹茹壹錢、枳實伍分、喘逆加萊菔子、金沸草各壹錢、傷乳食加乳炒大麥芽、神麴各貳錢、嘔吐加藿香、砂仁各壹錢、竈心土貳錢、泄瀉加蒼朮壹錢、煨木香伍分、焦神麴貳錢、腹痛加木香、赤芍、延胡各壹錢、兼驚加鈎藤、鈎叁錢、薄荷葉伍分、石菖蒲伍分、瘧疾加柴胡、寒重、桂枝肆分、熱重、黃芩壹錢、或桂枝、黃芩並用以和之。

參蘇飲治非時感冒之兼虛象者、驚風、痰熱、嗽喘、氣逆、脾胃不和、用人參、紫蘇、前胡、葛根、半夏、赤茯苓各貳錢、枳壳炒、陳皮、桔梗、甘草各壹錢、木香伍分、加薑壹片、水煎服、此扶正散邪、總司內外之良方也。

加味金沸草湯治風寒咳嗽發熱無汗、頭痛鼻塞、痰鳴氣逆等症、用前胡、荆芥、旋覆花、絹包各壹錢、橘紅伍分、製半夏、杏仁各壹錢半、枳壳捌分、紫蘇壹錢、桑白皮壹錢半、加薑壹片、葱貳枚、水煎服。

五虎湯治哮喘熱爲寒包之症用麻黃柒分杏仁一錢甘草肆分細辛貳分石膏貳錢引加細茶捌分和水煎服此初感之表劑也

暑濕

香薷飲治傷暑鬱熱或吐或瀉皆治之用香薷貳錢白扁豆壹錢厚樸薑汁炒壹錢如熱盛則去扁豆加黃連酒炒伍分如小便不利加茯苓貳錢如有搖擗加羌活壹錢鈎藤叁錢

六一散治傷暑濕蒸小便不利用飛滑石叁錢甘草伍分辰砂飛伍分共研細末清水調服欲發汗加薄荷壹錢豆豉叁錢蔥頭叁枚煎湯服

藿香正氣散治霍亂吐瀉心腹絞痛及四時一切不正之氣用廣藿香壹錢

伍分木瓜厚樸薑炒木香陳皮半夏製茯苓桔梗蒼朮米泔炒蘇葉自汗多者

去各壹錢炙甘草
嘔吐者加生薑壹片大棗貳枚水煎服

清暑丸。治上吐下瀉。卒然昏迷。表不發熱。製半夏。醋煑貳兩。茯苓壹兩。生甘草伍錢。共爲細末。生薑自然汁。和丸。每服貳錢。沸湯送下。

清熱滲濕方。治濕熱發黃。兼頭脹。舌白帶黃。渴不欲飲。或腹膨。或便溏溺赤。或面目遍身發黃。用蒼朮壹錢伍分。米泔浸炒。厚樸壹錢。薑汁炒。茯苓貳錢。澤瀉。黑山梔。各壹錢。生苡仁叁錢。甘草貳分。茵陳貳錢。發黃者加蘆根入此味。湯煎服。如症重。量加酒炒大黃壹錢。

燥火

益陰煎。治積熱傷陰。面塵口渴。舌絳唇乾。目昧皮膚皴揭。筋掣爪枯。或嗽。或便秘。瀉黃。凡燥勝則乾之症。用白沙參。生地。麥冬。去心。各叁錢。阿膠壹錢。石斛。胡蘆仁。各叁錢。茯苓。貝母。冬桑葉。蜜水拌。各叁錢。半生甘草。薄荷葉。各伍分。加淡竹葉。煎服。

加味導赤散。治心火蒸熱有汗、口渴舌紅、煩躁驚搐、小便短赤、用細生地叁錢、木通伍分、甘草梢叁分、赤茯苓、黑山梔各壹錢、淡竹葉、念張、燈心百寸、水煎服。如火甚者加犀角壹錢、兼肝火者目直視、煩悶、手尋衣領、或亂捻物、加黃連叁分、薄荷伍分、鈎藤鈎叁錢、兼脾火者唇口乾焦、加黃芩、天花粉各壹錢半、蘆根壹兩、搗汁、兼肺火者手抓眉目、鼻面、或痰喘氣逆、加桔梗、枳殼、桑白皮、牛膽製南星各壹錢、兼腎火者足心熱、火起湧泉之下、加黃柏、知母各壹錢、肉桂叁分。

痰食

加減二陳湯。治痰壅氣塞、呀呷作聲、用製半夏、茯苓各貳錢、陳皮去白壹錢、甘草叁分、生薑壹小塊、水煎服。如白痰加蒼朮、米泔浸炒壹錢、黃痰去半夏加酒炒、黃芩壹錢、貝母壹錢伍分、發熱頭痛鼻塞、加前胡、蘇葉、杏仁去

皮尖各壹錢，氣喘加枳實麩炒，甜葶藶隔紙炒，各壹錢，驚搐加白礬去絲嘴酒洗炒，天麻煨，黑山梔各壹錢，薄荷葉伍分。

保嬰備要治傷乳用陳紅麴壹錢半砂仁伍分薑壹片水煎服必節其乳乃效。

一得方治一切傷食將所食原物燒灰加雞內金炙灰磨枳實汁調服卽瘥治傷諸肉食及生魚膾用草菓麴包煨伍分焦山查肉壹錢伍分研末薑湯調服。

傷麵筋糲子等物諸藥不能消化用本物拌綠礬燒灰沙糖酒下傷糯米粉食用炒酒藥或酒麴三錢沙糖酒送下傷食索粉片用紫蘇煎濃湯加杏仁泥服之傷麵食傷荳腐俱用生萊菔湯煎飲之如無萊菔以萊菔子煎湯亦效傷菓子生菜冷物用木香砂仁各壹錢炮薑肉桂各

叁分麝香少許，共研末飯和杵作丸，炒山查煎湯下。傷蟹腹痛者，用蘇葉壹錢，生薑壹塊煎湯服。加丁香汁少許，尤效。傷食蛋滿悶者，生薑大蒜泥，共搗汁，頻嚥之。傷狗肉，用杏仁肆兩，去皮尖，和沸湯搗爛絞汁服之，二次必解。或以蘆根水煎汁飲之，亦效。

橘半枳朮湯，治食滯胸滿惡心，噫氣吞酸，或吐或瀉，腸鳴腹脹腹痛，用枳實麩炒壹錢，白朮土炒貳錢，橘皮壹錢，製半夏壹錢，如寒症，面眺白，舌胎白膩，口吐清水，出物不化，手足冷，得熱則腹痛稍解者，加乾薑炙甘草各伍分，如熱症，面赤唇乾，口渴，舌胎黃，出物酸臭者，加薑汁炒黃連柒分，如腹痛甚者，加廣木香壹錢，腹脹，加大腹皮壹錢，茯苓貳錢，如嘔吐者，加藿香砂仁各壹錢，如泄瀉者，加茯苓猪苓澤瀉，夏月傷暑吐瀉者，加六一散叁錢。

小品奇方治溺如米泔以作酒麴炒爲末酒調下或將糞蛆洗淨炙灰米飲下

經驗方治小兒喫土用輕粉壹錢沙糖和丸蕪子大空心米飲下叁丸良久泄出泥土瘥又救急方用乾黃土一塊研細濃煎黃連汁和土晒乾與服保幼大全治食土及一切生物以綠饜食末猪膽汁丸如豆大米飲下柒丸大生要旨治小兒喜喫茶葉生米以蒼朮米泔浸炒山梔炒各等分爲末蒸餅爲丸米飲下叁拾丸

慎齋全書治兒喜喫泥土瓦炭茶米等物用訶子肉貳兩白朮使君子肉炒各壹兩甘草伍錢麥芽炒捌錢共研細末將貳錢同兒所喜食之物一并和勻洋糖和服

肥兒丸治食積五疳頭頂結核臂瘦髮稀發熱作渴口疳目醫小兒色白腹

大青筋等症，白朮叁兩，枳實壹兩煎汁，收入晒乾，同黃土炒，使君子肉炒，神麩炒，麥芽炒，山查肉炒，山藥炒，蓮肉炒，歸身酒炒，各貳兩，青皮，肉豆蔻，麵包煨炒，黃連薑炒，浸炒，黑色，各壹兩，共爲末，蒸餅調糊，稍加煉蜜爲丸，木香壹兩，不見火研末爲衣，如麻子大，每服貳錢，空心米飲下，如蒸熱，腹脹痛無定時，面時紅時白，口饑吐清水，爲脾積化蟲，加乾蟾煨存性伍枚，胡黃連，白雷丸，白蕪荑仁，各壹兩，名疳熱肥兒丸。

疳積方。治疳積已成，百藥不效，服此方甚驗，用赤石脂，海螵蛸，石決明，牡蠣，滑石，各壹兩，捌錢，黃丹壹兩，貳錢，硃砂肆錢，各味爲末，水飛曬乾，逐一秤準和勻，每服叁分，用犍猪肝伍錢，竹刀劈開，摻藥在內，用米泔水煮熟，食肝飲湯。

保和丸。健運水穀，用白朮，山查炒，各貳兩，神麩炒，半夏製茯苓，橘皮，麥芽炒。

各壹兩，連翹、壳、萊菔子炒，各伍錢，共爲末，米飲爲丸，開水下，貳叁錢。
八珍粉調。理脾胃。用苡仁粉、白扁豆、蓮肉、芡實、茯苓、懷山藥，皆炒，各貳兩，砂
仁炒，肆錢，加香稻米炒黃，磨粉壹觔，白糖水和，或刻作糕烘脆，或調作糊
與服，俱可。

瘡瘍類

白禿瘡，頭生白痂，癢甚不痛，延久髮落，卽成禿瘡，初起宜肥油膏擦之，用番
木鼈、陸錢、當歸、藜蘆，各伍錢，黃柏、苦參、杏仁、狼毒、白坭子，各叁錢，鯉魚膽
拾枚，用香油拾兩，將前藥入油內，熬至黑黃色去渣，加黃蠟壹兩貳錢，溶
化盡，用布濾過，罐收，每用少許，用藍布裹于手指，蘸油擦瘡，久用必效，如
已成禿瘡者，先宜艾葉、鴿糞煎湯洗淨瘡痂，再用猪肉湯洗之，隨以躑躅
花油塗以殺蟲，方用躑躅花根肆兩搗爛，用菜油壹盃，燻枯去渣，加黃蠟

少許，布濾候冷，青布蘸擦，日用三次，氈帽戴之，勿令見風。

蟾拱頭，一名螻蛄癬，生于頭上，未破如曲蟾拱頭，破後如螻蛄串穴，瘡口雖歛，越時又發，三五相聯，纏綿難歛。治法先以花椒水洗淨，膿將瘡四腳串空之皮剪通，使膿無藏處，再將蜜陀僧肆兩，胞衣瓶內陳石灰貳兩，研爲細末，陳香油調敷于瘡上，不可空缺，以厚爲妙，護以棉紙，著肉緊貼，不可揭動，聽其自乾自落，卽愈。

戀眉瘡，生于兩眉之間，如疥如瘡，以青金散治之，松香貳兩，蛤粉伍錢，青黛貳錢，伍分，爲末，柏油調搽，或乾摻之，或加輕粉，枯礬，各叁錢，治胎毒疥癩甚效。如瘡退眉毛不生者，以黑驢屎燒研，香油塗之，立效。

翻皮，眼皮外翻，如以舌舐唇之狀，治法以熟石膏，梔子仁，各貳錢，生甘草陸錢，防風酒拌微炒肆錢，豨筴草酒蒸曬乾捌錢，共爲細末，將貳錢滾水

調服以貳錢煎湯洗瘡

旋耳瘡生于耳後縫間延及耳摺上下如刀裂之狀色紅時津黃水此瘡月盈則盛月虧則衰是以又名月蝕瘡以穿粉散搽之即愈方用輕粉研隔紙微炒穿山甲炙鉛粉黃丹水飛過各叁錢共研細香油調敷又方以蚯蚓糞燒研猪油和敷之

耳疳耳內悶腫出膿以滴耳油治之方用核桃仁研爛擰油去滓得油壹錢入冰片貳分每用少許滴耳內一方用黃連蜜炙兒茶枯白礬各壹錢臙脂煨存性壹錢青黛伍分輕粉冰片麝香各少許研勻先用棉杖攪去膿水另以柳杖蘸藥摻入耳底

鼻齩瘡生于鼻下兩旁色紫斑爛膿汁浸淫癢而不痛宜搽青蛤散方用蛤粉煨伍錢青黛壹錢半熟石膏伍錢輕粉黃柏各貳錢半共研末先用香

油調成塊，次加涼水調稀，薄塗瘡處。

唇腫，以雞心檳榔壹箇，炙存性研末，加冰片少許，香油調敷即愈。

口糜滿口糜爛，色紅作痛，甚則腮舌俱腫，聯及咽喉不能飲食，宜治以赴筵散，方用黃芩、黃連、生梔子、乾薑、黃柏、細辛，各等分，共研細末，每用少許，搽於患處。

走馬牙疳，此症多由癖疾積火，疹痘餘毒上攻，最爲迅速，牙根作爛，隨變黑腐，臭穢難聞，先用韭根、松蘿茶，各貳錢，煎成濃汁，乘熱以雞蘸翎洗患處，去淨腐肉，再以溺白散敷之，方用溺垢，即婦人屎桶中白鱗，火煨伍錢，白霜梅燒存性，白枯礬各貳錢，共研細末，日敷三次，再以青蓮膏貼之，方用青黛貳錢，乳香、輕粉各壹錢，白砒壹錢，共爲細末，香油調和，薄攤紙上用鎚槌打結實陰乾，每於臥時，用泔水洗淨拭乾，隨瘡大小，煎膏藥貼之，至

曉揭去，再以泔水洗淨吐之，至晚再貼。又方：眞珠、牛黃各伍分，冰片捌分，廣木香壹錢貳分，銅錄貳錢伍分，人中白叁錢煨，穿腸骨壹錢煨，卽狗屎中未化骨，於白色屎內尋之，卽得，金棗砒壹枚，用紅棗壹箇去核，以紅砒黃豆大壹粒，入棗肉濕紙重重包裹，慢火上煨至烟盡，共藥八味，各研細末，秤準和勻，先用防風貳錢，馬兜鈴叁錢，甘草壹錢，煎湯洗患處，以毛青布拭淨毒血，用藥壹分，磨陳京墨調藥搽之，大有神功。

齒齲，齒內生蟲，齒根脹痛腐爛，時出膿水，用雀麥連梃壹把，苦瓠葉叁拾片洗淨，將麥梃剪長貳寸，以瓠葉裹作伍包，廣壹寸，厚伍分，三年陳醋漬之，至日中時以兩包火中炮炙令熱，納口中熨齒外，冷更易之，取包置水中視之，卽有蟲長三分，老者黃色，新者白色，其效如神。

鑽牙疳，牙根肉內鑽出骨尖如刺，疼痛異常，法用鉞鉞就患處刺開好肉，連

牙齊根取出，如若血出不止，以浸冷濕紙換貼，以一字散搽之，牙卽生。方見

懸癰

舌瘡，舌上生瘡，飲乳不得，以野薔薇根剉碎，每用三錢，煎湯去滓，乘熱頻頻洗之。又千金方，以蜂房燒灰，屋間塵各等分，和勻敷之。又方，以桑白汁塗乳，令兒飲之。又方，以烏賊魚骨去壳燒研末，生雞子黃和塗之。

承漿瘡，生於唇下，成小片赤爛，輕者用甌蓋上炊流汁塗之，重者以青蛤散塗之。方見前鼻齧，兩口角之生瘡，治法同。

燕窩瘡，生於下頰，俗名羊鬍子瘡，初生小者如粟，大者如豆，色紅熱痒微痛，治以碧玉散搽之。方用黃柏末、紅棗肉燒灰存性，各伍錢，研細末，香油調敷患處。又方用鼠屎研末，香油調搽。

痰核瘡，生於頸項，頑核不消，累累如貫珠，此症有落草時已患者，用赤小豆

猪牙皂莢、硝石、黃藥、木鼈子，各半兩爲末，雞子清調敷患處，久之核消。

丹毒頭面及身，皮膚忽生火丹，發起赤腫而暈，有小碎瘡生紅暈上，瘡初發如錢，漸漸暈開，良久遍身，入口耳，到臟腑，卽不救，此證可畏，速治之。大甘草壹兩拍破，入水壹盞煎湯，溫溫令乳母口呷含漱，徐徐吐淋病處，以手掌與揩，不得犯指甲，仍與兒甘草湯喫，毒卽不暈開，良久卽淋，三度立瘥。

以下十二症發無定處

天泡瘡，狀如水泡，以黃金散敷之，方用黃柏、飛滑石、甘草研末，挑去泡中之

水，搽之，或以香油調敷，以龍蠶散治之，亦效。方見瘡癰

黃水瘡，初如粟米，癢而兼痛，破流黃水，浸淫成片，隨處可生，熱甚用青蛤散

敷之。方見鼻蠹濕甚用碧玉散敷。方見燕窩瘡或以烏雲膏通治，亦甚效。方見胎癩

浸淫瘡，初出甚小，後有濃汁，浸淫不已，漸大綿延，多生於面部，亦有延及遍

身者方用薏仁米壹兩、黃丹陸錢、黃柏肆錢、吳萸貳錢、濕則摻之、乾則香油調敷、此方治一切疥癩、肥水瘡極效、又方用鯽魚壹尾、長貳叁寸者、豆豉壹合研末、和杵如膏塗之、又方伏龍肝末壹錢、亂髮燒灰壹錢、爲末、豬脂和塗之、

黃爛瘡、其瘡初生如麻子、須臾胞漿出、膿爛如湯火所傷、用黃連末、胡粉、各壹兩、研勻、香油調敷之、又方桃仁去皮研細、以香油塗之、

疥瘡、凡疥瘡先從手丫生起、繞遍週身、有乾濕二種、其瘙痒皮枯而起、白屑者曰乾疥、癢痛相兼、而含膿水者曰濕疥、治乾疥以繡毬丸、方用川椒、輕粉、樟腦、雄黃、枯白礬、水銀各貳錢、共研末、大風子肉壹百枚、和末碾勻、加柏油壹兩、和搗作丸、以二掌合搓圓眼大、先以鼻聞、次擦患處、治濕疥以臭靈丹、方用硫黃、油核桃、生豬脂油、各壹兩、水銀貳錢、同搗、至水銀不見

星成膏擦患處，此方并治膿窩瘡。一方用白芷、蒼朮各貳錢，當歸、荆芥、金銀花各伍分，桑枝、柳枝、槐枝各壹兩，全蔥拾莖煎湯乘熱薰，後洗三五次，甚效。

痞癩，俗名鬼飯疙瘡，初起皮膚作癢，次發遍疙瘡，形如豆瓣堆壘成片，用龍蠶散治之。方用晚蠶沙壹兩，薄荷葉貳錢，研末和勻，香油調敷之。

葡萄疫，偏身結成大小青紫斑點，色狀若葡萄，惟腿脛居多，甚則邪攻牙齦，腐臭出血，形類牙疳而青紫斑點，其色反退，宜內服羚羊角散。方用羚羊角、鎊、麥冬、黃芩、知母、牛蒡子、防風、元參各捌分，生甘草貳分，淡竹葉拾片，水煎服。外用非疳散。方用冰片肆分，人中白煨去臭氣，存性，五倍子炒茶褐色，存性，各壹兩，共研末，先用米泔水洗口，後擦之。

手搔成瘡，用爐甘石煨存性，去火氣，加冰片少許，研細，豬板油蒸化調敷之。

痲子、生於暑月、菘豆粉、飛滑石、等分、加輕粉少許、研細、以舊棉蘸藥撲之、暑癩、或不避烈日、或藏頭乳母懷中睡覺、受熱氣薰蒸、致成暑癩、方用蝸牛、卽硬壳、蛭蟥、同銀硃搗爛、捏作錠子、陰乾、暑月熱癩初起、水磨將筆圈塗、四圍卽消、又方、黃梅水時、取新出蝦蟆、黑而細者、置瓶內、木蓋口、蠟封、埋地下、久化成水、取出蘸搽之、立效、

凍瘡死血、用雄野雞腦子、同白蠟研搗如泥、入陳香油調如稀糊、隔水燉熱、用毛青布乘熱蘸塗瘡上、冷則再塗、常令溫潤、無不效者、又方、於六月初六、十六、廿六等日、用獨頭蒜杵爛、日中晒熱、塗於發過凍瘡之處、卽於日中晒乾、忌患處著水、依法塗二次、永不再發、

陰腫、凡陰囊腫大、或痛或不痛、或二子入腹、或二便不利、以立消散敷之、方用赤小豆、風化硝、赤芍、枳殼、商陸、各伍錢、俱不宜見火、晒乾研末、用側柏

湯煎調敷患處

陰瘡治陰囊生瘡腫痛水出不瘥用蠟茶煎方蠟茶五倍子各伍錢膩粉少許共爲末先用蔥椒湯洗後用香油調敷又小品必效方見胎症陰囊腫墜

肛門作癢此蟲蝕也視其下唇內必生小白瘡或耳前後結小核如串珠者是也用雄黃銅綠等分爲末撒之卽效

鐵針誤入咽喉用癩蝦蟆數箇將頭剝去倒垂流血以盞接之得盃許灌入喉中移時連針吐出針自軟曲一方用笞籬煨存性研末每服叁錢黃酒調服亦能化針服用鉛糖壹觔食盡便出

誤吞銅物如吞諸物多喫葶藶能軟銅從大便出若誤吞鐵物用活磁石壹錢樸硝貳錢並研末以熱猪油同煉蜜調藥末嚥下必從大便出凡硬物

入腹腸中不能轉送，多食青菜豬油，自然與糞同出甚效。

骨鯁咽喉，凡誤吞魚骨者，用河中養蓄活鴨，倒掛垂涎，以盃接之，令患人仰臥灌下，其骨盡化，誤吞禽獸骨者，用狗壹隻，倒掛取涎，如前法灌之，甚效。竹木刺入肉淺者，以針撥出，或深者，或係鐵針硬物，搗螻蛄塗之，少時即出。湯火傷，凡湯燙火燒，皮膚痛甚，外起燎胞，即將胞挑破，泄毒，初傷用冷燒酒。

壹盃，於無意中望患者，胸前一潑，彼喫一驚，其氣必一吸一呵，則內之熱毒，隨呵而出矣。再頻以童便灌之，外用清涼膏塗之，方見初生無皮解毒止痛，不

致臭爛。次以鷲粟膏塗之，方以鷲粟拾伍朶，如無花以壳代之，將香油肆兩，燂枯瀘淨，入白蠟叁錢溶化，盡傾入盃中，待將凝之時，下輕粉貳錢，攪勻，俟冷，用振簪脚挑膏，手心中捺化，搽於傷處，棉紙蓋之，日換二次，其痛自止。次日用軟帛挹淨腐皮，再搽之，如生膿，以黃連膏貼之，則收斂，方用

黃連叁錢、當歸尾伍錢、生地壹兩、黃柏叁錢、薑黃叁錢、香油拾貳兩、將藥
燻枯、撈去渣、下黃蠟肆兩溶化盡、用夏布將油濾淨、傾入磁盃內、以柳枝
不時攪之、候凝爲度、又方、湯火傷、以狗油塗之、又方、以蚯蚓糞煨紅爲末、
雞子青調敷、又方、以青苔曬乾研末、香油調塗之、此症初終禁用冷水井
泥浸湯傷處、恐毒閉於內、寒滯於內、致成不救也、

眯目、誤觸諸物入眼、粘貼不出、眼皮疼痛難開、急磨京墨、塗於眼內、閉少刻、
翻轉眼皮、以骨簪挑去、卽愈、一方以手爪、抓下頭髮中垢膩、點入眼中、物
卽出、若飛絲入目、細刮人指甲和末、以口水點入、立效、一方以石菖蒲槌
碎、左目塞右鼻、右目塞左鼻、或薑汁、或桑樹白汁、皆可點之、若烟渣入目、
須將亂頭髮、或棕纓、緩緩揉之、不可湯洗、麥芒入目、以大麥煎湯洗之、卽
出、

跌墜傷以全蔥全當歸酒潤同搗爛敷傷處一方用生梔子同飛羅麵搗塗之、以布纏裹、拔出青毒卽消、一方以淨黃土壹塊、將人尿浸拌炒熱、絹包熨之、以久熨爲妙、

附保命丹、錫慳脂、

作悉蘭脂乃波斯國銀錒也

壹兩、水淘黑汁令盡、水銀壹分、以少棗肉、

研不見星、牛黃伍厘、麝香伍厘、研勻、粳米飯丸黍米大、每服叁拾貳丸、新

汲水下、

此方原缺從普濟方鈔補

又方、

治急慢驚風尙有陽證者常服安神化痰

全蝎拾肆個、防風、南星、蟬蛻、白殭蠶、天麻、琥珀、各

貳錢、白附子、辰炒、各壹錢、麝香五分、有熱加牛黃片腦、各五分、右爲末、粳

米飯搗丸、皂子大、金箔爲衣、乳汁或薄荷湯化下壹丸、

此方從東醫寶鑑鈔錄補參

本局新出版各種實用中醫書籍 (一)

■鬱岡齋醫學筆塵

▲王肯堂著……………一冊 定價三角

明王肯堂幼博覽九流百家。毋弗探究。而於醫學獨精。六科準繩一書。集明以前之大成。久已各家傳誦。復將平時見聞。隨筆劄記。著鬱岡齋筆塵十二卷。四庫全書曾采藏之。其書目提要復甚稱之。茲由錢君季寅將其關於論醫藥者。摘錄二卷。詰多扼要。精警。想見其見高識廣。凡讀六科準繩者。不可不備此以資參攷也。

■眼科龍木論

▲葆光道人撰……………二冊 定價五角

本書說理樸實。製方嚴密。有心得獨到之處。乃專家傳習之書。真眼科之津梁。銀海之寶筏也。顧版久漫滅。流傳甚渺。今由本局覓得初印本。特請毛伯英、陳岐襄諸先生詳加審定校勘。石印發行。以供同好。

■醫學見能

▲唐容川著……………二冊 定價四角

唐容川于中西醫學。造指甚深。所著中西匯通五種。早經馳譽醫林。有目共賞。今所著醫學見能。又出版。是書會刊于江西吉安。不久板燹。流傳絕渺。茲由秦伯未將家藏本。詳加校訂。并附眉批。發行于世。語簡而要。意深且精。百證咸備。良方彙集。醫者既謂匯通。不可不讀此書。以知用藥之變化。不知醫者。更不可不備此書。以便行旅時檢閱。

要目 診法 雜病 婦科 兒科 外科 救急 等六大門 三百餘小目

本局出版各種實用中醫書籍(二)

□ 外科學大綱

△許半龍著……………一冊 定價五角

許半龍學外科于其舅家吳江陳氏。盡得其心傳。更憑學說經驗。撰成此書。得素靈中藏之遺意。而陶冶外科金鑑外科正宗瘍科大全等。于一爐。說理中正詳賅。方劑平近多奇效。且編製新穎。可作學校教本。實當今第一善書也。由江蘇全省中醫聯合會審定。丁甘仁撰序。秦伯未校訂。名貴可知。深願學醫者人手一編焉。

要目 病理。診斷。治療。外瘍。內癰。經義。等六大門。二百餘小目。

□ 秘傳喉科十八證

△蔡鈞輯……………一冊 定價一角

蔡鈞自述云。前印驗方新編甫告成。而又得秘傳喉科十八證。類皆靈驗異常。壽身壽人。壽世三善兼備。用付石印。而廣流傳。庶體古人之施濟。而聊盡吾心焉。良以咽喉為病。凶險最甚。不加細察。禍不旋踵。在窮鄉僻壤。倉猝不及延醫。尤為危殆。本局鑒此書之精純。可法可行。爰本蔡鈞之意。印行流世。倘亦醫家病家所樂許乎。

要目 鎖喉。重舌。氣癰。乳蛾。弄舌。纏喉。啞脹。閉閉。等十八證。及總論用藥禁忌方劑數十小目。

中醫書局發行研究內經之必備參攷書

(一) 讀內經記

▲秦伯未著述

一冊 定價六角

內經一書在中醫界之價值無用申述。惜年湮代遠。傳寫訓詁。諸多錯誤。遂使學者。易領略真義。是書爲秦君十年來讀內經之結晶。考訂正誤。有如撥雲霧而重見青天。真軒岐之功臣。後學之導師也。書分三篇。上篇爲文字之考訂。中篇爲訓詁之攷訂。下篇爲句逗之考訂。由章太炎吳昌碩題簽。許半龍作序。卷首並附顧青瑤女士讀內經圖銅版。尤覺名貴。

(二) 內經研究之歷程考略

▲許半龍述

一冊 定價四角五分

本書爲提供內經研究上必要的準備智識爲限度。并就其實際上之背景。而予以有系統的說明。在理論方面。力求考證明確。對於歷來學者研究之作品。各就其得失。分代討論。誠爲最近內經研究唯一精詳之佳構。

(三) 內經類證

▲秦伯未編著

一冊 定價六角

本書集內經論病各文。分類編纂而成。凡五十篇。六百餘目。夫內經一書。爲中醫界中最古而最有價值之作。惜卷帙浩繁。學者每苦不能領悟。秦君研究內經。凡十載。歷任中國醫學院上海中醫專校等內經教授。本其經驗。闡古學。學者得此。即可知內經中有何種病。每病有何種症候。蓋能以科學的方法。加以整理者也。

清代名醫醫話精華出版預告


本書爲秦伯未先生整理清代醫學之第二部巨著。伯未先生前著清代名醫醫案精華一書。既已洋洋大觀。風行國內外。惟尙有多種醫案。均屬筆記體。與該書體例不合。未曾采入。茲特編纂本書。以期完滿。采入者如喻嘉言張石頑王孟英徐靈胎魏玉璜林義桐齊有堂程觀泉何鴻舫張希白李修之余聽鴻李冠仙姚晏如張畹英潘蘭坪吳東暘魏小泉等二十餘家。由丁福保顧惕生蔣文芳沈仲圭嚴蒼山柳亞子方公溥張天方等題序。選擇精嚴。洵屬醫家之秘籙。况醫話之作。將病症前後狀況。及用藥變換程序。均行叙列。學者得此。對於一病之經過詳情。可以瞭如指掌。倘能合醫案精華並讀。則更於臨診之時。既可胸有成竹。而處方之際。又能隨機應變。所謂二難并者。蓋獨具焉。茲已脫稿。由本局付印。不日即可出版。大小版式與醫案精華相同。以資一律。而使陳列。先此露佈。即希注意。

上海图书馆藏书



A541 212 0012 1601B

中華民國十八年七月出版



幼科易知錄

全書一冊 定價五角

著者 陽湖 吳溶堂

校正者 上海 秦伯未

發行者 上海 中醫書局

印刷者 上海 中醫書局

代售者 上海 大東書局

上海 三馬路 中 棋盤街 錦章圖書局

上海 棋盤街 錦章圖書局

台灣 蘭記圖書部

清 代 名 醫 醫 案 菁 華

十 大 特 色

一 二 三 四 五 六 七 八 九 十

本書為上海秦伯未氏所編纂清代二十餘名家之精華如葉天士薛生白吳鞠通尤在涇王旭高張仲華何書田趙海仙馬培之王九峯巢崇山張千里張聿青陳蓮舫秦笛橋凌曉五陳良夫金子久丁甘仁等全書一千餘面四十餘萬言洵未有之巨著洋乎大觀也由楊了公黃任之題簽陳蝶仙錢龍章錢季寅陳无咎王一仁楊宗凱許半龍等題詞序跋尤覺價值可貴夫醫案之作玲瓏活潑最足增人慧思而切實說理對證用藥尤屬不凡空泛實為醫者不可不人手一編以備不時參攷茲再將本書十大特色披露於后

一 搜集之富可謂醫案中未有之巨大著作

二 撰輯精嚴論與實驗並重與薰蕕不別者不可同日而語

三 所采醫案大半坊間未見謂為秘錄亦無不可

四 醫案觀其換方變化處最耐尋味而增巧思故本書于覆診方案足供研究者悉數采附

五 精華所聚者得此可免撰抉之勞亦無盲從之弊

六 各家卷首附小傳俾知其師承及經歷

七 有諸大名題序價值概可想見

八 印刷精美校對尤便

九 全書裝訂分平裝洋裝兩種平裝四冊附贈錦盒定價大洋三元七折實售二元一角

十 洋裝一冊布面金字加實洋四角外埠郵費每部兩角又按本書自發售預約後遠至

安南台灣東三省等處均紛紛前來訂購一月內銷數達三千以上為中醫界所僅聞茲存書無多購者尙希從速

中醫書局敬啓